

清

史

稿

清史稿

列傳二十六

沈文奎

李棲鳳

馬國柱

福建人 字國柱 號子龍 明末 清初 人

丁文盛

字聖九

祝世昌

沈文奎浙江會稽人少寄育外家王氏因其姓年二十爲明諸生北游遵化天聰三年太宗伐明下遵化文奎降從貝勒豪格以歸命值文館漢軍旗制定隸鑲白旗六年六月上自將伐察哈爾因略宣府邊外明文武大吏請盟上還師八月丁卯召文奎及同值文館諸生孫應時江雲深入宮賜饌命策和議成否文奎等皆言明政日紊中原盜賊蜂起民困於離亂勸上宣布仁義用賢養民乘時弔伐文奎等退各具疏陳所見文奎疏言先帝用兵之初勢若破竹蓋以執北關之釁名正言順其後多疑好殺百姓離心皆曰利我子女玉帛耳上寬仁大度推心置人今師次宣大長驅而入誰復敢當乃以片言之故卷甲休兵大信已著宜乘時遣使略遜其辭以踐張家口之約夫不利人之危仁也不乘

人之亂勇也不失舊約信也一舉而三美歸焉或謂南朝首吝王封次論地土人民和必不成臣謂和否不在南朝在上意定不定耳且和而成我坐收其利以待天時和而不成或虧領或宣天或山海乘時深入誕告於衆曰幽燕本金故地陵墓在房山吾第復吾故疆耳師行毋殺人毋劫掠則彼民必怨其君之不和而信我無他志矣大凌河降夷上赦之刀斧之下復加以恩育其所以去者皆父母妻子牽其念耳文王王政罪不及孥執殺逃亡已正國法豈可因兄及弟因父及子以一降夷而使衆降夷自危且使凡自大凌河降者人人坐疑非上明白宣諭上下際違終不能釋也我國衣冠無制貪而富者卽氓隸冠裳埒王侯清而貧者卽高官服飾同僕從乞上獨斷定衣冠之制使主權尊民志定賢愚僉奮國日以強雲深疏言南朝未能決和宜倍道徑取山海山海既破八城折入於我再與畫界議好和乃可定應時疏言用兵當先足民年來國用不舒今歲又被災十室九空宜乘時究方略轉虛爲盈此宜急議者也八門征稅正稅外有羨銀稅一兩非增三四分不收賸削窮民脂血此宜嚴廢者也六

部公廨已畢工人當盡心力爲上治事否則不惟負上抑且負此巨室此宜申飭者也大凌河新夷固自取滅亡然邊防嚴則遁逃何自越此亦宜申飭者也是歲近明邊蒙古部民逃入沙河堡明兵索還文奎應時疏中曰降夷曰新夷蓋謂是也九月文奎復疏言臣自入國後見上封事者多矣而無勸上勤學問者上喜閱三國志此一隅之見偏而不全帝王治平之道與在四書述詳史籍宜選筆帖式通文義者秀才老成者分任逐譯講解日進四書二章通鑑一章上聽政之暇日知月積身體力行操約而施博行易而效捷上無曰此難能更無曰乃公從馬上得之烏用此迂儒之常談而付之一哂也上人亦宜詳審臣第就書房言之書房出納章奏即南朝之通政司也自達海卒龍什罷五榜式不通漢字三漢官又無責成秀才八九闕然而來羣然而散遇有章奏彼此相諉動淹旬月上方求言而令喉舌不通是何異欲其入而閉之門乎宜量才委用或分任俾責有所專或獨任俾事有所總至筆帖式通文義者惟恩國泰一人宜再擇一二以助不逮立簿籍定期會使大事不過五小事不過十分

而任之課勸惰察能否而從以賞罰則政柄不搖賢愚並勸矣七年七月疏言
圖事功者以得人爲先務頃聞開科取士誠開創急事也然臣以爲非掄才之
完策上宜發明諭不拘族類不限貴賤不分新舊有才能者許自薦知人有才
能者許保舉自薦者擇有智識之臣畀以掄選而嚴挾私徇情之罰保舉者不
避父子兄弟但令立狀記籍異日考其功罪與同賞罰然後親加省試量才錄
用有技能則超擢無才行則責譴奴隸工商有善必取顯官貴戚有惡必懲招
以真心實意欣以高爵厚祿繩以嚴刑重罰好榮惡辱人情所同雖不能拔十
得五於千百中得數人而已足爲用矣崇德元年甄別文館諸臣文奎列第二
賜人戶牲畜授內弘文院學士七年八月以醉乘馬犯鹵簿論死上宥之仍命
斷酒順治元年世祖定鼎七月命爲右副都御史巡撫保定時畿南未定保定
大名眞定所屬諸州縣盜千百並起焚掠爲民害文奎到官駐眞定訓練所部
兵與巡按衛周胤謀捕治盜渠趙崇陽等數百人降有韓國璽者爲盜州晉泊
拒官軍文奎卽用崇陽捕斬國璽殲其徒遂分部總兵王燦守備劉文選等將

兵逐賊燬等討滅香爐喬家二寨戮其渠錢子亮趙建英文選等攻深州戮其渠于小安攻晉州戮其渠馬敷全於是冀州郭世先保定李庫內黃李君相順德袁三才數十渠魁並就俘戮散其脅從錄驍勇置部下畿南漸定州縣吏征賦仍明季舊習優免多則蝕賦攤派行則厲民文奎疏請悉從正額寧晉泊地肥而賦輕豪右競占通賦爲州縣吏累文奎疏請招民分耕納賦二年正月疏言畿南民重困歲貢綿絲諸品皆求諸他行省請改折色二月又論諸衛所地納賦丁入保甲皆當屬州縣吏並見採擇李聯芳張成軒等爲盜南皮鹽山間四月遣都司楊澄守備徐景山捕治戮聯芳等九十三人尋命加兵部右侍郎總督陝西五月改命總督淮揚漕運淮揚羣盜高進忠魏用通高陞三人者爲之魁復有鄭報國司邦基挾明宗室新昌王與相應爲亂文奎遣游擊裴應陽等擊斬用通總兵王天寵亦擊破陞報國邦基爲其徒縛詣江寧以降進忠走崇明亦降十二月復令總兵孔希貴蘇希樂逐盜如皋得其渠於錫藩劉一雄三年八月又與淮徐道張兆雄發兵擊斬邳州盜楊秉孝王君寔等江淮間始

稍安十月疏請禁革蘇松諸府征漕積弊悉去官戶儒戶濟農倉諸名著爲令四年正月以擅免荒田賦又瀆請明陵祀典奪職五年十二月起爲內弘文院學士六年充會試總裁八年大學士剛林祁充格得罪文奎以知睿親王多爾袞令改實錄不上言當坐上命免議四月復命以兵部侍郎左副都御史總督漕運巡撫鳳陽請復姓沈氏七月疏請慎選運官清核舍餘合選股丁清勾黃快皆漕政大端凡四事十年率師討膠州叛將海時行十一年遣兵捕朱周祺清通秦濱海通寇江北廬鳳淮揚諸府災文奎請蠲賦戶部議未定冬盡未啟征九月文奎坐督運愆遲左遷陝西督糧道尋卒與文奎同時以諸生直文館者雲深應時同被召對又有李棲鳳楊方興高士俊馬國柱馬鳴佩雷興輩蓋皆文奎疏中所謂秀才八九者也棲鳳方興國柱鳴佩興自有傳雲深後不著應時爲啓心郎以祝世昌請毋以俘婦爲妓爲改疏稿坐死士俊嘗上疏謂上定例一丁予田五日夜食於此出力役於此出民已苦不足況以細量田名五日實止二三日將吏復占沃地役民以耕宜禁革民間貸金當視金多寡定取

息重輕其有逾度者宜坐罪日者滿洲以計田士俊用當時語也士俊入關後嘗爲湖廣巡撫收長沙克衡州常德有勞方上召文奎等策議和成否亦諭吏民令建言有胡貢明者疏言我國與南朝未嘗無內外君臣之分今既議和當遣使修表姑聽其區畫如不欲爲之下遂圖大事必如漢高祖而後可因謂鼓舞用人發百姓立法令收人心皆未若漢高祖貢明先嘗上疏請吏養人舊例略言太祖時芳草創土地人民財用皆與諸貝勒均之今尙沿此習上名雖有國寶不啻正黃旗一貝勒耳一人寸土上與諸貝勒互不相容十羊九牧卽有中原不可以爲治出師得財當以三屬上七分畀諸貝勒得人衆而贖之視其賢不賢厚薄予奪權得以自操而人心亦歸于一至是又別疏申前說並反覆言養衆傑當破格如高祖之于三傑上覽先疏頗韙其語謂後出師當用汝議覽後疏責其語冗貢復上疏抗辨七年又有扈應元者疏詆漢官但求名利語近愆略如貢明別疏陳七事謂備荒宜儲糧編丁宜恤老幼築城建關宜不妨農業出師宜選公正廉能吏拊循新下郡邑取士宜尙德行求言宜置諫官乘

機取天下在人心不在火器上覽其疏至論築城建關疑勿善也不竟閱應元亦上疏抗辨貢明隸鎮紅旗亦諸生應元隸正白旗自署隱士

李棲鳳字瑞梧廣寧人本貫陝西武威父維新仕明爲四川總兵官嘗官薊遼家焉馬鳴佩字潤甫遼陽人本貫山東蓬萊其先世嘗爲遼東保義副將因占籍遼陽左衛棲鳳鳴佩皆以諸生來歸事太宗並值文館崇德元年甄別文館諸臣棲鳳鳴佩俱列二等賜人戶牲畜漢軍旗制定同隸鎮紅旗世祖定鼎授棲鳳山東東昌道鳴佩山西冀南道順治二年收湖廣移棲鳳上荆南道鳴佩下湖南道方棲鳳值文館治事勤慎達海等聞於上上命司撰擬遂寫國書達海卒棲鳳言文館無專責積貯官文書人得竊視慮有漏言上召王文奎等諮和議成否棲鳳上疏言臣侍文館幾七年今上與南朝議和謀及羣臣臣愚以爲時政有可惜者二當速圖者六先帝勞心力訓練勁旅以遺上上當法先帝賞罰出獨斷有功雖賤雖仇必賞有罪雖貴雖親必罰若不振奮鼓舞必且習爲泄泄弛已成之業此可惜者一也上天姿英敏誠大有爲之君也臣見諸臣

章奏輒曰上寬仁大度此則諛耳創國之君不欲過刻亦不欲過寬用人聽言審察其可否中夜而思如何使人畏如何使人喜而後可以驅使倘信虛譽而毗于仁厚必誤上英敏矣此可惜者二也民以食爲天今歲水且螟米值驟昂上宜速出師攻關外八城八城爲我有豈復慮我民之枵腹耶一失此機民無食且流散國亦稍稍衰矣當速圖者一也上舊得人民兵農工役物物皆備惟頻歲役民築城此毀彼建不得休民未必無怨昨聞大凌河西夷復加誅戮奈何先與之誓而後又殺之也今宜罷非時之工廣養人之惠當速圖者二也南朝東西支梧奔命不遑勢必且南遷祖大壽與上嘗有盟約當急遣使游說乘機進兵遲則失時當速圖者三也君雖聖必賴賢臣以調變之近雖有二三骨鯁之臣位卑祿薄信任未專如永平道張春在彼中號有謀略上宜隆以禮遇心雖金石將爲我銘我國雖邊鄙未始無才重賞之下必有勇夫當速圖者四也諸臣多請制定衣冠尙未允行夫所謂衣冠豈必如南朝紗帽圓領而後可但能別尊卑差貴賤卽是制度國體威嚴視斯人心繫戀視斯綱紀法度風移

俗易莫不視斯富速圖者五也達海竭心力奉上及其卒斂乃無韉其廉若此未聞上破格矜恤總兵布三取遼陽首功先帝賜赦免死今以事奪官且下之獄不過以愆直得罪功過貪廉自古無全才不可拘於一當速圖者六也其爲上荆南道參政明年六月遷湖廣右布政使十月命以右副都御史巡撫安徽吳繼程國柱等爲寇休寧婺源間棲鳳檄總兵李仲興許漢鼎等帥師捕治獲所置總兵江烏鄭恩祥降張天麒江周等千人其黨趙正挾明瑞昌王誼貴攻宿松棲鳳率總兵卜從善冷允登禦之沔池斬千級獲誼貴及正子捷應弟允升招撫江南大學士洪承疇上其事旋坐屬縣濫征賦不舉劾左遷六年復自浙江嘉湖道參議授右僉都御史巡撫廣西明桂王由榔遣兵略廣東諸郡縣尙可喜耿繼茂軍駐廣州棲鳳駐南雄爲具儲胥七年合兵克韶州並破雷州廉州諸寨八年明將曾志建侵韶州棲鳳令南韶道林嗣琛游擊張璋等擊之斬二千餘級九年遣副將先啓玉等攻欽州獲叛將李成棟子元胤十年明將李定國自梧州侵肇慶棲鳳遣兵敗之龍頂岡尋分遣總兵徐成功吳進功等

獲洪圖及其黨蔣懋修鍾武等江西總兵金聲桓叛其將潘永禧犯徽州國柱遣滿洲駐防官兵擊破之復祁門黟二縣上命征南大將軍譚泰帥師討聲桓克九江南康饒州等府明尙書余應桂據都昌出沒鄱陽湖國柱令副將楊捷等從譚泰攻克都昌獲應桂復擊敗其將鄧應龍等於武寧十月廣東叛將李成棟自南雄侵贛州國柱遣將與江西巡撫劉武元合兵擊殺之六年有王定安者爲亂於湖廣陷羅田結英山盜陳元等掠霍山國柱遣中軍副將朱運亨等擊之戰於三尖山元等引去又令總兵卜從善剿白雲梅家英竄諸寨明石城王統錡率五千餘人自金紫寨赴援倚山列陳從善與戰俘賊甚衆獲所遺總兵孔文燦副將方學達等國柱復率師會江甯昂邦章京巴山提督張大猷討六安盜圍將軍寨擊斬其渠張福寔降所置總兵王俊副將霍維倫等安徽境諸弄兵者往往依山結寨相望至是始盡明魯王以海在舟山其將吳凱據大蘭山爲聲援上命國柱策剿撫國柱知甯波諸生方聖時與以海臣嚴我公友使爲游說我公遂降國柱護送京師上遣齋敕招凱國柱復寓書焉凱與其

將顧奇助姜君獻陳德芝等降七年加太子少保九年七月有張自盛者爲亂於福建闖入江西境保太覺嚴國柱檄提督劉光弼擊斬所置總兵李全等遂獲自盛十一年正月明將張名振攻崇明劉河吳淞國柱募水師遣總兵王環副將張恩達分將之敗之於靖江復敗之於泰興燬其舟名振引去二月有顧龍者爲亂於湖廣號紅頭賊自桂東侵江西境國柱與湖廣總督祖澤遠合兵攻桂東得龍亂乃定復加太子太保旋致仕國柱初至江南駐防兵與民不相習國柱善爲撫戢令行禁止兵民相安康熙三年二月卒天聰八年舉人凡十六人漢人習漢書者齊國儒朱燦然羅繡錦梁正大雷興馬國柱金柱王來用得八人國柱及繡錦興來用入關後皆至督撫而國柱繡錦興又同值文館繡錦亦遼陽人以諸生來歸天聰五年與馬鳴佩同授工部啓心郎六年上大凌河新附人衆計國中無問官民計口儲糧有餘悉輸官視市值記籍徐爲之償有餘糧不輸者許家人告發繡錦鳴佩疏言民有餘糧孰肯輸之官縱令首告有仇則許無仇則隱所得必少且民不敢以糧入市新人糧不足及舊人之

無糧者皆無所於糴不若出令無問滿漢蒙古官生軍民人輸糧一斗有糧者固易辦無糧者人出銀二三錢糴以輸官亦無大損其有餘糧願輸官者獎以升賞此兩便之術也崇德元年五月授內國史院學士纂太祖實錄成得優賚漢軍旗制定隸鎮藍旗七年兼牛錄額真順治元年從入關七月命以右副都御史巡撫河南時李自成西走其黨掠衛輝懷慶間而原武新鄉諸縣盜競起繡錦至官與總兵官祖可法等謀防禦疏言自成之衆二萬餘攻懷慶甚急明尙書張縉彥等擁兵河上副將郭光輔參將郝尙周不應徵調叛而爲寇明兵在南流寇在西請發兵靖亂上已令豫親王多鐸爲定國大將軍帥師南征令取道河南捕治羣寇繡錦亦遣衛輝參將趙士忠等攻破婁兒寺盜寨擒其渠繡錦請以北河荒地萬餘畝令守兵屯墾得旨允九年十一月擢兼兵部右侍郎總督湖廣四川湖南諸州縣尙爲明守自成從子錦擁衆降於明侵湖北繡錦至荊州錦率衆來攻順承郡王勒克德渾自江寧來援錦敗走勒克德渾師還錦又至繡錦帥師禦之錦復敗走有胡公緒者據天門八百洲四出焚掠

戎署鹽道周世慶繡錦遣中軍副將唐國臣署總兵楊文富等分道討之獲公
緒毀其巢三年六月遣總兵官徐勇擊破麻城山寨獲其渠梅增周文江岳州
署總兵官高蛟龍等擊斬滿大壯獲龍見明等九月明總督何騰蛟寇岳州繡
錦遣將禦之多所斬獲十月遣總兵鄭四維等定彝陵枝江宜都三州縣四年
定南大將軍恭順王孔有德等略湖廣取長沙衡州寶慶辰州諸府繡錦條奏
增設鐵協下部議行王光泰以郎陽叛上命侍郎喀喀木帥師討之繡綿與合
兵克郎陽光泰走四川五年金聲桓以江西叛湖南騷動常德武岡辰沅諸府
州復入於明繡綿疏留喀喀木駐荊州而分遣總兵徐勇馬蛟麟等分守要隘
屢敗明將馬進忠等上復命鄭親王濟爾哈朗共率師徇湖南漸收諸郡縣繡
錦疏請移降卒腹地毋使師還後復爲餘孽煽誘上嘉納其言九年七月卒贈
兵部尚書弟繪錦自通政司理事官再遷終貴州巡撫興亦遼東人太祖時以
諸生選直文館事太宗授祕書院副理事官崇德間遷都察院理事官漢軍旗
制定隸正黃旗順治元年十月命以右副都御史巡撫天津李聯芳張成軒爲

亂滄州南皮間興與總兵官婁光先帥師討之成軒等將遁出海師已扼海口乃驚潰投水死者強半興復遣兵捕治斬渠宥脅盜盡疏言大沽海口爲神京門戶請置戰船爲備下所司議行二年四月移巡撫陝西陝西方被兵民多流亡興招徠撫綏疏述其狀上旌以冠服裘馬三年肅親王豪格帥師自陝西徇四川師未至有孫守法者爲亂於興安賀珍又以漢中叛興移潼關兵戍商州密檄漢羌道胡全才爲備待師至悉撥定興疏請隴州置兵臨洮鞏昌留屯軍防邊皆報可四年四月以疾乞罷十年八月復起巡撫河南未上卒贈兵部侍郎來用亦隸鎮藍旗授工部啟心郎順治初再遷山西布政使三年師略四川三月授來用戶部右侍郎總督山西川陝糧餉駐西安疏言陝西兵後民困請蠲荒徵熟山西銅缺鑄錢多定值過低商不前請酌增四年疏言漢南邊賀珍亂蹂躪荒殘請恩賑並敕部儲備肅親王還師餉糈五年疏言河西回亂連河阻諸軍南討請發湖廣漕供餵又言漢中屯軍歲餵數十萬請專設餵司皆如所請六年疏言兵出鎮贍其孥如所食糈司兵者請自離伍日起司餵者請

自到軍日起持異議請定例盡一部議以應徵日起中途逃亡不得濫與八年正月御史茹玠劾來用專倚中軍王植自隳職業部議左邊援赦免七月裁缺九年命巡撫順天十年移駐河間十一年以定南王孔有德喪歸其屬吏或格詔書不出迎坐左邊十四年改授河南大梁道尋卒

丁文盛廣寧人初爲明諸生天命六年歸太祖天聰間授兵部啓心郎七年正月偕同官趙福星疏言師行戒毋擾民子女玉帛秋毫無犯但發倉庫以佐軍興攻關東八城當先其易者後其難者舍寧錦前衛但得其他小城因糧以度師進攻山海舊制編民爲兵十丁而取一當令諸甲喇及領屯將吏慎選年事盛強身家相稱者毋許以他人代永平砲兵衣食不足宜擇其技精者授千總督演習食精視鑄砲之工哈喇沁降者置遼河外慮且逃亡宜移屯腹地及孔有德耿仲明來降五月文盛福星上疏請水陸並進攻山海取旅順并言毛帥來歸令金漢官吏出羊雞鵝米肉以贖其兵臣慮新人未必肥而舊人已不勝瘠復使市馬力尤不能舉若用八門稅一二月已足孔有德等毛文龍部曲文

龍嘗使冒其姓故是時猶稱毛帥及旅順既下七月文盛福星復請城旅順加
意防守考績授世職牛象章京順治初從入關授山東登萊兵備道參政二年
六月授右僉都御史巡撫山東濰縣盜張廣爲亂以數千人攻萊州文盛令游
擊馮武鄉等討之戰三埠再戰紅山口斬廣黨尼思齊趙明春廣走平度游擊
楊遇明逐之及於徐里曠射廣殲其徒明季馬政弛驛馬缺求諸民文盛疏
請以餘存驛站銀市馬明季增牙稅及他雜稅文盛疏請罷臨清東昌平山諸
衛置兵五千人盧額逾半文盛疏請減留二千人節餼令州縣募壯丁逐捕盜
賊別疏又請教有司清刑獄禁獄卒毋虐囚皆下部議行三年盜發荏平高唐
諸縣文盛請兵上遣副都統覺善率師捕治四年文盛被彈事不勝任左遷河
南按察使稍遷福建布政使七年卒文盛子思孔字景行順治九年進士選庶
吉士四遷授陝西漢羌道副使康熙二年巡撫賈漢復劾思孔追胥役蝕糧草
逾限左遷河南開封府同知思孔詣通政使自列胥役蝕糧草獄瘵家醫事上
巡撫巡撫久乃入告未嘗逾限下總督白如梅勘寔復授直隸通薊道直隸未

設布政按察兩司八年巡撫金世德請增置保定守道領錢穀以授思孔再遷江南布政使時吳三桂亂方定師行江西湖廣思孔主餽餼應期不愆禁旅還自福建叱役具舟科量悉當修蘇州府學置育嬰堂養濟院諸政皆舉二十一年遇大計總督于成龍以思孔督賦未中程不得舉卓異特疏薦廉能上命准卓異二十二年擢偏沅巡撫偏沅所領七郡溪山環互民獫狫處反側初定餘孽每煽亂思孔撫其渠孽盜漸散復獻龍書院御書旌樹二十七年移撫河南方上而有夏逢龍之亂復移撫湖北逢龍私自署置千總胡耀乾參將李廷秀馬兵周凱萬金鑑皆號總兵守備林德號副將上命振武將軍瓦岱帥師討之趣思孔詣荊州主餽思孔以武昌倉庫皆陷賊諸軍餽乏乃發河南庫帑護詣襄陽諸軍資以濟疏報稱旨七月瓦岱師至聲賊黃州誅逢龍而耀乾等尙據武昌拒命思孔至漢口具舟渡江單騎叩漢陽門呼耀乾出見耀乾等遂降思孔入武昌數耀乾等罪而誅之並戮所置巡撫傅爾學布政婁方順驛道金奇功凡八人武昌遂定九月復設湖廣總督以命思孔陳龍越八者逢龍之徒也

二十八年五月謀爲變期夜半思孔晡始聞執陳龍越入戮於市他悉不問設水師分戍武昌荊州岳州常德營歲饑便宜發帑市米江西平值以糶三十三年四月移督雲貴八月卒

祝世昌遼陽人先世在明初授遼陽定邊前衛世襲指揮十數傳至世昌爲鎮江城游擊天命六年太祖克遼陽世昌率三百餘人來降仍授游擊統其衆命董築瀋陽遼陽海州三城事竟授瀋陽城守叅邦章京天聰五年從征大凌河六年太宗閱烏真超哈兵資諸將世昌與焉尋遷禮部承政授世職參將七年七月克旅順世昌疏請大舉伐明謂攻城當專用紅衣砲國中新舊三十餘具瀋陽留四具城守已足餘悉載軍中砲多則糜藥亦多藥局製藥硝丁淋硝慮不足於用旅順新獲硝磺宜以其半送瀋陽製藥師行克城邑當得練達薩慎之吏不求小利不貪財賄乃能戢民心保疆圉宜預選令從軍備任使用兵當兼奇正輕兵先發奪人畜掠儲峙然後整軍挾紅衣砲自大道徐進上尋遣貝勒阿巴泰等將二千人略山海關外未深入引還崇德七年疏請禁俘良家婦

露入樂戶上諭都察院承政張存仁祖可法曰世昌豈不知朕禁樂戶而爲此
疏不過徇漢人藉此要譽耳朕度世昌身在我國心猶嚮明世昌果忠於明明
以元功臣田劉張三姓之裔隸樂戶世昌何不聞有言乎朕視滿蒙漢若一體
爾等同心輔國嘗諸五味貴調劑得宜若各相庇護是猶鹹苦酸辛不得其和
爾等徇世昌而不舉劾咎在爾等曾子曰吾日三省吾身爾等能如曾之省身
則何過之有旋命固山額真石廷柱馬光遠與諸漢官會鞠坐世昌死其弟世
蔭同居知其事啓心郎孫應時爲改疏稿皆死禮部承政甲喇章京姜新甲喇
章京馬光先見疏稿稱善當奪職坐罰上命誅應時而貸世昌世蔭徙邊外席
北新解承政與光先皆贖罪順治二年召還隸漢軍鎮紅旗四年七月授右副
都御史巡撫山西時盜發孟五臺永寧靜樂諸縣世昌遣兵捕治五年十二月
上遣英親王阿濟格等成大同備邊總兵官姜瓖疑見誅遂叛世昌檄諸縣兵
還守省城瓖遣兵陷朔州岢嵐攻代州急世昌帥師赴援疏請發禁旅出居庸
取大同分兵出紫荆關至代州濟師上命阿濟格等討瓖別遣敬謹親王尼堪

等帥師鎮太原六年正月瓌將姚舉等掠平原驛戕冀甯道王昌齡下忻州固山額真庫魯克達爾漢阿賴等破舉衆石嶺關舉棄忻州走既復襲陷甯武萬鍊踞偏關劉遵破繁峙靜樂及交城東關世昌疏趣援尼堪師至出攻甯武逾月未下移師向大同瓌黨以其間攻陷保德交城石樓永和諸縣世昌復請發禁旅守太原曲沃李建泰以大學士罷歸謀應瓌叛世昌得其手書以聞會瓌爲其將楊振威所殺以大同降師討定汾絳潞安永甯甯鄉諸州縣建泰與瓌將李大猷等入太平師從之建泰等亦降是歲平陽盜虞允韓昭宣爲亂攻陷州縣應瓌陝西總督孟喬芳將兵擊破之世昌以聞山西底定七年卒諡僖靖天聰間有徐明遠者疏陳時事因言軍中得良家婦上悉令歸故夫此誠如天之仁禹湯文武殆莫能過臣竊見遵化永平俘得良家婦其主貪利輒鬻入樂戶得無損上仁聲且樂戶既多吏民游冶損財物耗精血於國無益買良爲賤古著於令甲今豈可任其所爲而不之禁乎明遠蓋自永平降者事互見張存仁傳世昌繼以爲言乃得罪

論曰順治初諸督撫多自文館出蓋國方新造用滿臣與民間用漢臣又與政地閩惟文館諸臣本爲漢人而待直既久情事相浹政令皆習聞爲最宜也文盛世昌未嘗直文館而自太祖朝已來附抒讜效忱遂與文奎棲鳳國柱輩分領疆圻各著聲績天聰間諸言時政者並以類附見當時章奏流傳蓋鈔經綸草昧母俾終湮也

清史稿

列傳二十七

李國英

劉武元

庫禮

胡全才

申朝紀

馬之先
劉定通

于時躍

原定原

吳景道

華川英

劉清泰

華川英

陳錦

李國英漢軍正紅旗人初籍遼東仕叨隸左良玉部下官至總兵順治二年與良玉子夢庚來降三年從肅親王豪格下四川討張獻忠授成都總兵五年擢四川巡撫獻忠既滅其將孫可望劉文秀等降於明分遣所部王命臣等竄川南譚洪譚文譚詣楊展劉惟明等竄川東與李自成舊部郝搖旗李來亨袁宗第劉二虎邢十萬馬超等遙爲聲援洪犯保寧國英擊敗之命臣據順慶國英分兵三道水陸並進克其城獲其將李大德朱朝國等邢十萬馬超所據地近保寧國英偕總兵惠應詔討之獲其將胡敬復潼川逐之至綿州獲所置吏呂

濟民等募招惟明展來降遂下綿州六年進復安縣克彰明破關山縣徇石泉有謝光祖者據寨抗師行遣兵破斬之七年遣副將曹純忠劉漢臣徇川北諸郡縣設伏擊斬寇渠老鐵匠黃鷄子十九年可望文秀大舉寇保寧橫列十五里勢張甚國英督兵擣其中堅別遣兵出間道擊其後大破之授世職二等阿達哈哈番十一年加兵部尙書時可望等破成都重慶夔州嘉定皆爲明守吳三桂李國翰駐軍漢中國英請敕進兵十三年加太子太保十四年擢陝西四川總督三桂等自漢中下重慶遂趨貴州文洪詣二虎等分屯忠州萬縣合軍攻重慶總兵陳廷俊嚴自明禦之敗走文又合十三家兵逼重慶國英自保寧赴援次合江詣殺文以降國英入城安撫洪亦與其將郝承裔陳達先後出降文所部猶據涪忠二州國英遣總兵王明德擊破之十七年承裔據雅州復叛國英督兵至嘉定分三道進勦破竹管關入承裔走黎州追獲之十八年川陝各設總督命國英專轄四川康熙元年明石泉王奉鎰攻叙州國英討平之時搖旗來亨二虎宗第等據茅麓山出掠四川湖廣陝西錯壤諸州縣畿三省合

軍討之國英疏言賊巢橫險要我師進攻未能聯合宜豫會師期分道並入使賊三路受敵彼此不暇兼顧一路既平就近會師賊可盡殲上命將軍穆里瑪圖海將禁旅討之國英與西安將軍富喀禪副都統都敏會剿明年督兵進巫山趨陳家坡破二虎壘二虎走死搖旗宗第夜遁總兵梁加琦佐領巴達世逐之至黃草坪獲搖旗宗第及所置吏洪消熬等又遣總兵李良植破小夾寨獲明東安王盛浪叛將賀珍子道寧以所部降四年疏言全川底定裁留通省兵四萬五千名以馬二步一戰守各半定額從之五年卒謚勤襄七年追敘國英功授世職一等阿思哈尼哈番孫永陞襲職雍正間官南陽總兵坐事戍軍台世宗念國英前勞召還海擢至工部尙書以永陞從子時敏襲職乾隆初定封一等男

劉武元字鎮藩漢軍鎮紅旗人初籍遼東仕明官游擊佐祖太壽守大凌河天聰五年從大壽出降崇德六年授刑部參政順治元年改授甲喇額真子世職三等甲喇章京二年授天津兵備道三年擢南贛巡撫四年遣副將劉伯祿徐

啓仁等剿捕瑞金石城興國龍南寧都上猶諸州縣土寇克魚骨蓮花丁田鈞
刀嘴諸寨斬其渠葉南芝劉志諭劉飛等五年正月金聲桓王得仁以南昌叛
江西諸郡縣皆附外連閩粵贛州介其間武元召諸將歃血誓得仁以二十萬
人來攻啓仁出降圍合武元城守三月糧盡斥家財佐軍勵士卒奮戰遂破得
仁兵得仁退屯東山引武元空城出戰將設伏邀擊武元知其謀天未明兵數
百持炬爲前驅得仁兵望見伏盡出力戰得仁中創遁聲桓聞我師至九江謀
退保南昌武元出奇兵襲其後敗之大湖港斬獲無算十月叛將李成棟復來
攻衆號百萬武元先出兵數百撓之夜縋城出死士劫破十餘壘遂令諸將分
兵東西南三門出戰大破之成棟以數騎走叙功加右都御史兼兵部侍郎賜
紫貂冠服甲冑佩刀鞍馬六年征南大將軍譚秦旣克南昌遣梅勳額員覺善
等與武元會師克信豐成棟宵遁墮水死武元分遣副將先啓玉參將鮑虎游
擊左雲龍等捕成棟餘黨定瑞金等郡崇義諸縣進攻梅嶺破木城五獲成棟
將劉治國七年平南王尚可喜徇廣東師自南安入武元遣副將粟養志以兵

從克南雄詔州二府又遣副將高進庫游擊楊繼洪起元等剿寧都土寇彭順慶副將楊遇明劉伯祿賈熊董天用等剿大庾土寇羅榮順慶應聲桓爲亂自號軍門親侑郡邑榮自明季倡亂楚粵間自號五軍都督衆數萬阻山結寨二十餘四出劫掠至是皆就戮叙功加太子太保兵部尙書遇恩詔進世職一等阿達哈哈番又一拖沙喇哈番十年引疾還京十一年卒贈少保諡明靖濊武元長子襲職疏請追叙武元贛州全城功進二等阿思哈尼哈番官至副都統浩武元次子康熙間官廣西潯州知府孫延齡叛城陷被戕并及其子中樞中梁中柱中樹事聞贈太僕卿

庫禮喜塔臘氏滿洲正白旗人太祖創業初其四世祖昂果都理巴顏來歸庫禮事太宗崇德初徵朝鮮兵從征伐命庫禮將其軍五年睿親王多爾袞等伐明圍錦州上遣戶部參政碩詹使朝鮮發水師五千人米萬斛請大凌河庫禮與梅勒額眞洪尼哈將三十人導六年從鄭親王濟爾哈朗圍錦州克其郭斬八百餘級復與噶布什賢噶喇依昂邦薩穆什喀攻松山北崖庫禮以朝鮮兵

二百餘先登科爾沁部人或降於明發礮中庫禮手庫禮不爲動督戰益力卒破明兵攻松山明兵擊正紅廂藍二旗分守地庫禮與左翼將領勒卜忒擊之明兵引卻以功授世職牛象章京賚所獲牲畜七年擢戶部參政順治初改戶部侍郎論定都功加半箇前程旋坐阿豫親王多鐸指集視八旗女子論罰錢二年命如淮安總理漕儲四年九月鹽城土寇竊發庫禮與漕運總督楊賢遠親往撫慰未幾其渠周文山等以八百人夜襲淮安自夾城東門缺口入攻庫禮官廨庫禮率中軍張大治旗鼓王國印將帳下卒數十人禦之其妻盡出廨儲矢僕婢齎送助戰衆皆一當百自丑至辰所殺傷過當文山等潰走逐斬百八十餘級盡收其印劄軍械城賴以全有稱明益王者奉唐王聿鍵隆武號屯廟灣有衆數千舟百餘將攻淮安庫禮與賢遠等計設伏以待敵舟揚帆直上至車家橋伏發水陸夾擊敵死者過半餘衆走還廟灣固山額真張大猷巡撫陳之龍以師從之敵據劉莊塲爲屯凡十以次剿撫旬日乃盡定考滿進三等阿達哈哈番尋召還七年致仕復進一等阿達哈哈番加拖沙喇哈番卒謚僖

恪

胡全才山西文水人明崇禎進士官兵部主事順治元年固山額真葉臣定山西疏薦起原官二年自鄜中移陝西漢羌道駐漢中時叛將賁珍爲亂全才上官撫綏彫瘵安集流亡招明將趙光遠部曲齊陞王明德李世勳等來降盡收其軍械與知府楊可經等練士卒聚芻糧爲備珍突至圍城陞等奮勇衝擊世勳中流矢死城守三十餘日援師至珍遁走漢中得全工部侍郎趙京仕疏言漢中重地宜設巡撫且薦全才才稱任三年擢寧夏巡撫四年疏請頒本朝律典及性理通鑑諸書令士子誦習又疏言寧夏舊額兵三萬有奇設總兵及中軍副將分統之其後兵裁及半罷中軍副將往者總兵應徵發叛將王元遂乘隙戕巡撫焦安民爲亂宜復舊制廣兵額設中軍調征興慶副將馬寧管擒斬王元請仍補斯缺下部議並如所請元黨馬德既降復叛全才與總兵劉芳名發兵討誅之語詳芳名傳是歲山陝蝗見全才爲捕蝗法授州縣吏蝗至如法捕輒盡不傷稼因其法上聞命傳示諸直省初全才任漢羌道時令凡受賀

珍割付者許自首仍予割付如其官旋揭告漢羌總兵尤可望苛罰冒饒藏匿
偽官可望即以擅給割付許全才並坐罷全才詣部自陳部議以全才功大罪
小復除江西饒南道十年經略洪承疇奏薦令從征湖南尋命撫治邯陽提督
軍務李自成將郝搖旗劉體純等降於明及明桂王走南徵遂屯聚房竹羣山
間爲盜全才分兵扼衝要馳察穀城南漳諸地形勢檄諸將進討戰屢勝十三
年明桂王所置總兵李企晟入邯陽與搖旗等合全才遣諸將朱光祚等密捕
之執企晟旋擢湖廣總督卒官贈兵部尙書諡勤毅

申朝紀漢軍鑲藍旗人初籍遼東天聰八年授刑部啟心郎文館朱延慶疏陳
時事勸朝紀溫雅正直練達世務處家儉守身約訥言敏行足任鴻鉅崇德元
年賜人戶牲畜順治元年授河南河北道駐懷慶李自成之黨二萬餘來犯朝
紀登陴守禦晝夜不少懈有渠乘白馬薄壕麾衆攻城朝紀舉砲殪之賊悉斃
竄二年遷江南布政使擢山西巡撫三年疏言驛遞累民始自明季計糧養馬
按畝役夫臣禁革驛遞濫應里甲私派請飭勒石各驛永遠遵守俾毋蹈前轍

又疏言各省驛站銀舊額十五萬有奇明李裁充兵餉驛費不足輒私派於民請敕部復原額又疏言賦役全書應裁應留諸項請覈實詳酌俾有司不得私徵濫派疏並下部議行四年陽城民王希堯買國昌等以邪教倡亂朝紀遣中軍都司白璧同冀南道武延祚率兵捕治悉誅希堯國昌等汾州營卒李本清任興等據永寧銅柱寨爲亂朝紀赴汾州遣冀寧道王昌齡等率兵捕治獲本清等焚其寨寧鄉民楊春暢等復以左道據冷泉寨爲亂朝紀遣平陽副將范承宗等討平之擢宣大山西總督五年卒延慶漢軍鎮黃旗人入關官至江西巡撫順治間治山陝著績效者又有馬之先劉宏遇馬之先漢軍鎮藍旗人初籍金州衛順治初以諸生授昌平知州四遷至湖廣布政使七年授江西巡撫土寇王才據終南山肆掠之先遣游擊陳明順等自子午鎮進剿才竄走敗之高關峪又敗之化羊峪獲才又捕治諸盜何紫山孫守金唐珍玉等十一年自成餘黨劉二虎郝插旗等侵入陝西境之先與漢興總兵趙光興發兵三道迎擊破小廣略寨斬其將傅奇遷宣大山西總督十三年調川陝總督加兵部尚

書入覲上諭之曰陝西天下咽喉爾當視孟喬芳倍加勤慎方克有濟十四年卒諡勤僖劉宏遇漢軍正藍旗人初籍遼東與弟奇遇並以諸生入祖大壽幕佐軍諮天命間太祖伐明次三岔河宏遇與奇遇挈家來歸籍明諸邊兵馬數目並畫戰守事陳奏上曰得廣寧當官汝久之未用崇德元年上疏乞自效命大學士范文程等試之授弘文院副理事官順治元年譯遼金元三史成賜白金鞍馬尋授工部理事官遼山西朔州道二年與副將侯大節等捕治蔣家峪黑草嘴土寇擢陝西布政使五年授安徽巡撫金聲桓叛江西皖北盜蜂起宏遇如池州分遣鎮將逐捕盜渠王貳甫等移駐安慶與總督馬國柱捕治英山霍山潛山諸盜得其渠孔文燦等餘盜悉平六年裁缺召還七年授山西巡撫時姜瓖亂初定其黨竄匿保德五台府谷諸縣山谷間宏遇請免通賦懸驛困矜恤諸死事家又疏言兵後民田荒蕪殆盡前此師討姜瓖竭蹶供芻糧今捕治餘寇日需輸輓值二麥未收秋禾遇蝗災農失耕時得旨下所司蠲賑又與總督佟養量總兵剛阿泰剿五臺山寇劉永忠高鼎降陝西土寇楊茂宏遇撫

山西四年建忠烈祠祀守土諸臣死姜瓖亂者並修太原陽曲學宮築汾河諸隄山西民誦其惠旋以捕治土寇未入奏即籍沒給事中張榕論宏遇專擅尋奉詔甄別督撫宏遇左授福建督糧道十八年卒

于時隴漢軍正白旗人初籍廣寧順治二年以諸生授安徽合肥知縣尋遷河南懷慶知府四年擢河南道靈寶盧氏二縣寇發時隴與副將寇徽音游擊孔國養等入山捕治破其寨斬寇渠劉芳張進澤張三桂等寇乃平七年遷山西按察使時隴善聽訟至卽定讞民稱之曰于不落九年遷山西布政使坐在陝西薦舉屬吏失當左遷經略洪承疇薦其才命赴軍前効用尋復薦補湖廣驛鹽道十二年超擢廣西巡撫明宗人盛濃盛添據富川結土寇王心蔣乾相等勾集搖犷窺旁近郡縣時隴會提督線國安總兵全節討平之十三年明將龍輅屯柳州時隴密約國安與定南王護衛李茹春總兵溫如珍等督兵攻之陳斬輅逐北三十餘里餘衆悉遁十四年師下雲南時隴疏請賓州設兵防守並分屯柳州備策應下所司議行明桂王由榔號召諸降附土寇假以公侯分

據郡縣爵林則李勝李喬華懷集則何奎豹李盛功富川賀縣則馬寶梁忠南寧太平則賀凡儀曹友並倚險爲巢四出侵掠寇羅法達廖仁倫等復擾臨桂永福荔浦修仁諸縣時雖親督兵捕治所陷城邑次第克復敍加都察院副都御史十八年擢廣西總督明德陽王至潯走安南時雖招使來降敍功加右都御史康熙二年卒蘇宏祖漢軍正紅旗人初籍遼陽崇德三年以舉人授戶部啓心郎賜朝衣一襲免丁四八年考滿授世職牛錄章京順治初授河南河北道累遷陝西布政使世職累進三等阿達哈哈番十年坐計典失實左授福建福甯道十三年遷左僉都御史十五年授南贛巡撫十七年寧都寇發宏祖斥資造火器遣兵擣其巢禽其渠李玉廷別有土寇謝上遠羅一鑑徐黃毛等據廣東平遠五指石界連閩贛宏祖發兵討之上遠詐降潛走匿紅畬宏祖遣將李宗輅以計禽斬一鑑黃毛等七人夜進兵逐賊至柑子窩中木溪毀五指石寨攻紅畬賊縛上遠獻斬之十八年遣游擊王把什捕治廣昌土寇乘兩攻不備破滴水羊石二寨斬千餘級禽其渠幸連昇蕭來信康熙元年甄別督撫

宏祖解任三年卒

吳景道漢軍正黃旗人初籍遼東廣甯衛天聰間授吏部啓心郎崇德元年改都察院理事官疏劾刑部理事官耶位貪汙不法狀鞠實黜耶位追贓貸死耶位銜景道甚誘都察院筆帖式李民表與同居許景道鞠虛民表坐誅籍耶位半產景道以不察民表違禁移居他旗罰如例景道疏論睿親王多爾袞專擅坐奪官順治二年起授河南布政使擢巡撫時河北初定河南五府餘寇未靖寶豐宋養氣新野陳蛟商城黃景運等各聚數千人侵掠城邑景道檄總兵高第副將沈朝華等分道捕治誅養氣等四年鄖陽土寇王光泰率千餘人犯浙川景道遣參將尤見等與總兵張應祥合兵擊卻之五年羅山土寇張其倫據雞籠山寨出掠景道遣都司朱國強修文煥等督兵討之破寨擒戮其倫并其黨朱智明趙虎山等曹縣土寇范慎行等煽寧陵商邱考城虞城儀封蘭陽祥符封邱諸縣土寇並起爲盜屯黃河北岸景道檄第督兵討之寇退保長垣第以師從之寇走蘭陽景道遣文煥督兵追擊斬千餘級薄曹縣寇列柵拒守景

道檄總兵孔希貴自衛輝道肥城斷寇東走路游擊趙世泰都司韓進等率精騎分道夾擊戰於東明殲寇數千獲慎行誅之餘衆悉潰散敘功加兵部侍郎七年進尙書八年商州土寇何紫山等掠盧氏夜襲世泰營第督兵扼擊走商南景道檄應祥督兵討之寇盡殲九年以塞汴河決口與河道總督楊方輿同賜鞍馬冠服十年以老疾乞休十三年卒贈太子太保謚愨僖李日芄漢軍正藍旗人初籍遼陽太宗時命以諸生入內院理事賜五戶順治元年授永平知府三年遷霸州兵備道授知州張儒策諭降土寇李振宇等數百人擢僉都御史四年加右副都御史授操江巡撫金聲桓以江西叛日芄親督兵屯小孤山磨盤洲令同知趙廷臣參將汪義游擊袁誠等迎擊五年戰於彭澤得舟二十餘寇中礮及溺死者無算六年裁安徽巡撫命日芄攝其事土寇余尙鑑挾明宗室統錡知聲桓餘黨據險爲二十餘寨掠桐城潛山太湖諸縣日芄遣副將梁大用等督兵討之克皖澗寨進圍飛旗寨斷水道分兵四路合擊拔之又破桃園等寨擒戮統錡尙鑑餘大小和山等十八寨皆降九年加兵部侍郎十年

討平徽州赤嶺土寇張惟良十一年甄別直省督撫加兵部尙書明將張名振屢自海入江犯鎮江瓜州劫漕艘日凡令於鎮江檀家洲湖水淺則植椿深則編筏環以鐵索阻來舟兩岸置礮南自鎮江至盪山北自瓜洲至三江口建新隄設木橋通巡兵往來令盪山瓜洲等四營守備更番督水師防禦五里置一汛讞察詳密諸寇匿江爲藪俘斬略盡十二年加太子太保旋卒諡忠敏

劉清泰漢軍正紅旗人初籍遼陽名朝卿以諸生歸太宗賜今名崇德六年試一等入內院辦事順治二年擢弘文院學士九年充會試副考官授浙江福建總督時鄭成功據廈門陷漳浦海澄南靖諸縣上命其父芝龍作書勅清泰諭降十年二月清泰疏劾巡撫張學聖巡道黃樹總兵馬得功前此偵成功赴粵潛襲廈門擢其家資致成功修怨連陷城邑學聖等並坐黜三月清泰得成功報芝龍書略言就撫後願得浙東嶺南地駐兵清泰疏上聞並論成功語浮誇議撫當詳慎上嘉其遠慮五月平南將軍金礦攻海澄以饑不繼還軍漳浦會上敕封成功海澄公畀以泉漳惠潮四郡地遂罷兵清泰請駐軍浦城備不虞

從之十一年疏言成功雖降不薙髮其黨違掠如故降無實意宜發禁旅赴福建駐要地資策應下諸王大臣議清泰旋以病乞假還駐杭州成功發兵攻陷潭泉上授鄭親王世子濟度爲定遠大將軍率師討之左都御史龔鼎孳疏劾清泰當金礦攻海澄不能同心合力及招撫未定又不控扼險要致海疆被陷坐奪官十八年聖祖卽位起秘書院學士授河南總督康熙三年以報墾荒地萬餘頃加兵部尙書四年以疾致仕卒佟岱漢軍正藍旗人先世居佟佳父佟三歸太祖任梅勒額眞佟岱與兄養量同授牛叅額眞養量順治初官至宣大總督駐陽和有惠於民佟岱崇德元年從伐朝鮮以縱掠降民坐死命奪官罰緩以贖三年授吏部副理事官兼甲喇額眞六年師圍錦州七年攻塔山杏山皆在行擢正藍旗漢軍梅勒額眞八年從克前屯衛中後所予世職牛叅章京順治元年從克太原二年從討李自成師自陝西徇湖廣遂下江南與總兵金聲桓駐守九江定南康南昌瑞州袁州諸府以所俘獲奏聞因疏言故明鍾祥王慈若等衰殘廢棄或存其餘喘彰我朝浩蕩之仁得旨故明諸王赴京朝見

旋令攝湖廣總督三年還京授兵部侍郎復從征湖南自岳州進長沙戰衡州克寶慶武岡六年復從討姜瓖拔渾源左衛朔州汾州太谷諸城世職累進一等阿達哈哈番兼拖沙喇哈番歷戶吏諸部十一年代清泰爲浙江福建總督疏請中海禁斷接濟片帆不得出海違者罪至死十二年成功陷舟山十三年復陷台州修俗與巡撫秦世禎不協互劾上爲移世禎操江巡撫召修俗還京以李率泰代修俗不卽行復疏自敘剿撫功上責其冒功戀祿下李率泰等按狀奪官留軍功三等阿達哈哈番卒秦世禎漢軍正藍旗人初籍廣東順治二年以貢生除直隸文安知縣三年行取授御史疏請畫一各省裁免賦役從之四年巡按浙江八年甄別臺員列一等尋命巡按江南世禎察准揚各郡蠹役害民嚴治其罪徒黨聚盟仇訴告者世禎執爲首者繫之獄疏上其事並言懲蠹於事後不若使不爲蠹請飭督撫以下至州縣毋於經制外濫設胥役並定年限毋令久充上從之時方大兵後田畝淆亂官爲丈量胥役因緣爲姦世禎令編列魚鱗冊使民自丈量贏縮胥復其舊荒坍皆有別州縣徵賦民或逾額

輸納世禎限夏稅五月秋糧九月先給易知單示以科則定數又令每甲彙列賦額及輸戶爲滾單使里長按戶遞傳輸賦則填注先行之蘇州民以爲便條列以聞通行諸府又以徵銀設櫃有司奉行不實請增司府印封立日收簿輸戶自封投櫃驗數書之簿又請革僉點糧長之例改官收官兌並下部著爲令巡撫土國寶貪酷病民以世禎劾罷十年還京遷大理寺丞十一年擢浙江巡撫疏請增造戰艦精選水師別疏言沿海漁舟往往通寇請按保甲法以二十五舟爲一隊無事聽探捕有事助守禦並議行十二年與佟岱互劾調操江巡撫解佟岱任命暫管總督事尋以李率泰等疏論成功陷舟山世禎不能辭咎與佟岱並奪官卒

陳錦字天章漢軍正藍旗人初籍錦州仕明官大凌河都司崇德間來降予世職牛象章京加半個前程漢軍旗制定授牛象額眞順治元年自內院副理事官授登萊巡撫青州土寇楊威秦尙行結明將劉澤清爲亂錦遣兵討平之二年土寇張廣焚掠掖濰諸縣遣兵擊敗之廣降於澤清復寇平度犯萊州錦遣

兵捕治授策設伏徐家曠射殺廣盡殲其衆擢操江總督與招撫大學士洪承疇並駐江寧三年明瑞昌王誼石等密結城人爲亂錦與承疇詢知之閉城捕治諸爲亂者誼石以兵至擊破之四年疏言閩山爲鎮江咽喉江甯門戶宜建立砲臺置兵備江北要口設臺亦如之兩岸兵船接哨分防沿江設烽墩使聲勢相通章下部議行遷浙江福建總督鄭成功爲寇據延平將軍塞地高險俯瞰諸縣攻不能破錦命壘土高與寨等乘以登陴遂克之歲大饑錦遣兵次第收復撫輯流亡民賴以安五年成功將鄭彩以舟師入據長樂連江諸縣錦與靖南將軍陳泰等分兵收復師進次興化斬成功將顧世臣等十一人六年遣總兵張應夢馬得功等復羅源永春德化福安諸城江西山寇侵延平陷大田尤溪錦遣兵收復獲明新建王由模等七年疏請進攻舟山八年錦與固山額眞金礪劉之源提督田雄等會師以大艦隨潮出敗明兵於橫洋獲其將阮進乘霧攻舟山明魯王以海出走遂克之墮其城置定關總兵駐師守焉九年成功寇漳浦平和錦督兵赴援戰江東橋敗績左次同安賊夜入其帳刺中要害

遂卒贈兵部尙書

論曰國初民志未壹諸依山海險阻而起者往往自託於明遺要之爲民害廓清摧陷封疆之責也國英定四川合師討茅麓山積最高武元守贛州庫禮守淮安全才守漢中禦寇全城亦其亞也朝紀等捕治土寇皆能勦其官者若清秦策鄭成功謂挾怨而叛殊不中事理錦屢勝而蚌遽爲何人所賊防衛亦稍疏矣

清史稿

列傳二十八

科爾崑

覺善

甘都

譚拜

法爾

席特庫

藍拜

鄂碩

伊拜

烏魯圖

阿哈尼堪

星納

褚庫

科爾崑阿顏覺羅氏滿洲正藍旗人世居瓦瑚木祖翰太祖時來歸父碩色官牛象額真科爾崑初爲貝勒阿巴泰護衛事太宗未冠從伐察哈爾朝鮮皆有功令隸噶布什賢崇德五年從伐明圍錦州明兵數萬屯松山科爾崑與牛象額真索渾巴牙喇甲喇章京瑚里布挑戰敗之明總督洪承疇總兵祖大壽合兵十餘萬迎戰科爾崑與索渾等陷陳殲騎數十六年從英親王阿濟格伐明駐杏山明兵數千自寧遠至科爾崑先衆馳擊逐敵至連山馬中流矢仆科爾崑躍起殲敵騎奪馬乘以還從英親王視濠敵猝至索渾陷圍中科爾崑單

騎翼以出明兵數千自沙河所至侵牧地率噶布什賢兵擊破之七年從貝勒阿巴泰伐明次豐潤破明軍次河西務與巴牙喇甲喇章京鄂碩將數十騎偵敵敵將將射科爾崑先發貫其臂逐之從馬上相搏同墮水敵將頗有力握科爾崑臂抑使入水科爾崑捶其脛而踣繫以歸八年授牛象額貝勒兵部理事官順治元年入關擊破李自成逐之至慶都從固山額貝勒葉臣攻太原設伏殲敵又從英親王阿濟格討自成湖廣屢剿敵壘叙功授世職牛象章京三年從肅親王豪格西討張獻忠次漢中擊破叛將賀珍進擊獻忠戰西充鳳凰山大破之獻忠既殪復與輔國公岳樂尙書巴哈納等殲其餘黨師還累進二等阿達哈哈番六年授噶布什賢章京從鄭親王濟爾哈朗征湖廣破湘潭下寶慶武岡分兵趨沅州與巴牙喇甲喇章京白爾赫圖以數十騎先驅白爾赫圖陷陳失其馬科爾崑奪敵馬掖之上並馬突圍出復縱騎奮擊破敵進沅州自道州出龍虎關進世職一等兼拖沙喇哈番九年從敬謹親王尼堪徇衡州明將李定國列象陳迎戰科爾崑語巴牙喇甲喇章京西伯臣曰象不畏矢石惟鼻

脆吾爲君射之矢再發貫象鼻象奔師從之追奔數十里敬謹親王聞勝輕騎疾進遇伏戰沒科爾崑三入圍求得王遺骸師進次寶慶明將孫可望以數萬人屯山巔科爾崑督兵奮擊可望潰走貝勒屯齊遣學士碩岱與科爾崑還奏軍事疏不言王戰沒事聞下議政王貝勒大臣會勸科爾崑言不知疏云何鄭親王呵之科爾崑大言曰臣自髫髻侍太祖弱冠事太宗轉戰二十餘年今奏事不明死其分奈何輕相侮上察其無罪命寬之但奪世職十三年擢巴牙喇叢章京十四年從大將軍羅託下貴州既定貴陽令科爾崑以五千人取黃平梅勒額眞瑪爾賽副之明將白文選據七星關科爾崑令瑪爾賽將二千人出萬奇嶺大道誘文選出戰僞敗數十里文選躡其後科爾崑將三千人自間道疾趨出文選軍後瑪爾賽還戰文選敗走克黃平師還康熙元年出定義州土寇二年從將軍穆里瑪圖海下湖廣討李白成餘黨李來亨等圖海出歸州穆里瑪出宜昌科爾崑與噶布什賢噶喇依昂邦賴塔將五千人先驅迭戰皆勝次茅麓山郝永忠以數萬人與來亨合拒戰科爾崑升山覘之俟隙縱擊破之

夜設伏來亨以萬餘人襲我軍伏發敗走明日復戰來亨兵以大刀藤牌護陳我師張兩翼科爾崑擣其中堅陳潰來亨倚譚家砦屯糧計持久科爾崑分兵破石坪進圍砦其將李嗣名出戰中流矢死科爾崑斷其後道十餘日其將高必玉等出降科爾崑還與穆里瑪合軍圍海亦至令滿洲兵守隘綠旗兵爲長圍困之來亨自經死餘黨悉降自成餘黨至是乃盡殄師還授世職拖沙喇哈番科爾崑從征伐常爲軍鋒廉介嫉惡遠勢熬拜專政科爾崑獨不附八年卒子巢可託官至盛京刑部侍郎

覺善李佳氏滿洲正紅旗人世居薩爾濟父通果歸太祖授牛录額真卒覺善嗣滅葉赫克濟陽遼陽皆在行間授世職備禦擢甲喇額真天聰三年從太宗伐明下永平四城佐固山額真納穆泰等守灤州明兵來攻圍合覺善勸兵出戰奮稍踰堞與甲喇額真阿爾津牛录額真庫爾纏趨擊明兵潰奔俄復集迫城下覺善擊卻之明兵發石壕城堞覺善力禦明兵不能登凡五敗明兵阿敏棄永平出關納穆泰等亦突圍走明兵阻道力擊敗之師還與諸將待罪上以

覺善力守城既出猶殺敵釋其縛進世職游擊五年上自將圍大凌河明兵自錦州驟至屯小凌河岸上遣偏師渡河迎擊兵不盈二百覺善奮入陳陷重圍力戰得出我兵別隊與明兵戰有軍校爲明兵所得授之歸明監軍道張春總兵吳襄將步騎四萬距大凌河十五里駐軍覺善從貝勒碩託以右翼兵直踰春壘明兵敗挫進世職二等甲喇章京崇德五年授正紅旗梅勒額真駐防義州六年從攻錦州坐攻圍不力削級上攻錦州自將軍松山杏山間明兵薄我軍謀奪砲覺善以所部禦之明兵敗走師圍松山掘塹立營明兵夜來侵復戰卻之八年與梅勒額真諱布等駐錦州又從鄭親王濟爾哈朗伐明攻寧遠明總兵吳三桂邀戰擊卻之進攻前屯衛明兵出戰蒙古兵稍却覺善督右翼兵奮擊大破之遂克其城順治元年從入關擊李自成覺善創於砲仍奮戰二年進世職一等從順承郡王勒克德渾南征次江甯自成餘黨一隻虎等寇湖北命移師討之三年師次石首令與固山額真葉臣等率精銳徇荊州破敵分勦遠安南漳宜昌悉定師還賜黃金十兩白金三百兩山東土寇擾恩齊河平陰

諸縣命覺善率兵討之斬其渠魁地王其衆萬餘殲焉五年從大將軍譚泰討叛將金聲桓七月師薄南昌至六年正月克之移師討叛將李成棟攻信豐覺善督所部樹雲梯先登拔其城師還次贛州復分兵戡定新喻安福諸縣敕功並遇恩詔世職累進二等阿思哈尼哈番賜號巴圖魯七年從睿親王敗於中後所坐私出射獵降一等阿達哈哈番兼拖沙喇哈番八年上親政復世職擢都察院左都御史尋命仍專領梅勒事進世職三等精奇尼哈番十五年以老病乞罷康熙三年卒諡敏勇乾隆初定封三等男子吉勒塔布自有傳

甘都先世自葉赫徙居巴林因氏巴林太祖時率子弟來歸授牛象額眞旗制定隸蒙古鎮蓋旗天聰元年從伐明次寧遠明兵屯城北山岡甘都手大纛直前擊破之三年復從伐明克大安口復敗明兵於玉田上自將取永平四城克遵化甘都與焉即命佐察哈喇等駐守四年師棄遵化出邊甘都殿擊敗追兵八年予世職三等甲喇章京授兵部參政崇德二年考滿進二等甲喇章京尋更定部院官制改兵部理事官冬從貝勒岳託等伐明擊敗明太監高起潛越

明都徇山東克濟南四年春師還道經縣復克其城以功進一等甲喇章京五年從索海等伐索倫部索倫兵五百據掛喇爾屯拒戰甘都及理事官喀喀木督兵破柵入斬級二百俘二百三十人以歸六年從伐明圍錦州明總督洪承疇屯松山屢以步騎出戰甘都輒擊敗之恭順王長史徐勝芳爲敵困甘都突入陣援之出七年錦州下以功加半個前程順治元年從入關破李自成復從豫親王多鐸徇陝西克潼關取西安二年五月移師定江南復與固山額眞恩格圖瑪喇布等下宜興崑山諸縣進三等梅勒章京三年從端重親王博洛略浙江逐明將方國安至黃巖國安入城守圍合甘都察國安勢蹙撤圍縱使出擊之國安兵大潰城遂拔師入福建甘都先衆克分水關逐明唐王聿鍵至汀州降漳州及漳平縣五年命署巴牙喇章京從征南大將軍譚泰徇江西討叛將金聲桓七年三月進二等阿思哈尼哈番尋卒於軍

譚拜他塔喇氏滿洲正白旗人父阿敦事太祖天命元年正月朔旦太祖始建號諸貝勒大臣上表阿敦與額爾德尼侍左右受表額爾德尼跪展讀如禮阿

敦壽領固山額真太祖初征取撫順李永芳出降阿敦引調太祖厥後事不著
譚拜事太宗天聰五年以牛象額真從伐明圍大凌河城祖大壽城守遺百餘
騎突圍出譚拜與巴牙喇甲喇章京布顏圖追斬三十餘人獲馬二十有四八
年授世職牛象章京遷甲喇額真九年從伐察哈爾收降人遂伐明代州譚拜
與噶布什賢章京蘇爾德安建立將四十人伏忻口明邏卒三百經所伏地斬
馘過半崇德元年從伐明蒲明都北趨蘆溝橋再敗明兵二年與甲喇額真丹
岱薩蘇喀等將四十人略明邊次清河明兵七百拒守擊之潰率盡二並獲其
馬三年從貝勒岳託伐明入牆子嶺攻豐潤擊明兵多墜壕死復攻破明太監
馮永盛諸軍四年從略錦州率巴牙喇兵破明兵於城南以功加半箇前程五
年授兵部參政六年兼任正白旗蒙古梅勒額真七年冬從伐明山東克利津
八年春出邊以所部擊敗明總督趙光抃范志完總兵吳三桂白廣恩諸軍師
還賚白金以功進三等甲喇章京順治初從入關三年擢兵部尙書尋從肅親
王豪格西討張獻忠道陝西與固山額真瑪喇希等擊敗叛將賀珍下四川屢

破獻忠兵復與固山額真李國翰渡涪江敗獻忠將袁翰四年調吏部尙書旋殲獻忠入關後世職四進至二等阿思哈尼哈番七年三月卒子瑪爾賽附紮拜語見紮拜傳孫多奇輝降襲三等乾隆初定封三等男法譚亦他塔拉喇氏滿洲正紅旗人世居瓦爾喀初以巴牙喇壯達從滅葉赫取遼陽授牛彖額真天聰三年從攻甯遠敗明兵於城北山岡七年取旅順崇德三年從伐明敗密雲步卒趣山東克鄆城四年從伐虎爾哈部克雅屯薩城六年從圍錦州禦明總督洪承疇兵於松山遂敵至塔山擊之多赴海死八年從攻甯遠克前屯衛中後所順治元年擢甲喇額真兼工部理事官從入關破李自成從順承郡王勒克德渾逐自成湖廣其兄子錦犯荊州法譚以精騎蹂之斬獲甚衆降自成弟孜及其將田見秀等世職累進一等阿達哈哈番兼拖沙喇哈番五年授右翼步軍總尉康熙元年以病致仕卒

席特庫佟佳氏滿洲鑲藍旗人父努顏率族屬歸太祖授牛彖額真卒席特庫嗣事太宗擢噶布什賢章京率兵出錦州得明諜明兵自耀州至席特庫赴援

郤敵從圍大凌河裨將多貝陳沒席特庫入陳以其尸還明兵自寧遠來援與戰一卒墜馬席特庫領難入陳援以出六年與巴牙喇甲喇章京熬拜等略明邊八年與噶布什賢章京圖魯什訶敵錦州松山皆有俘馘察哈爾部人有散入席爾哈席伯圖者上命席特庫與蒙古布哈塔布囊等逐捕斬七十餘級得其戶口牲畜尋與卦爾察尼堪以二十騎往濟農城偵明兵至西拉木輪河遇降明蒙古百人席特庫設伏盡殲之二人逸而奔席特庫射殪其一爲我國謀者所獲上嘉席特庫以少勝多賜甲冑旌之復從大貝勒代善略大同敗明兵自陽和轉戰趣天城左衛徇宣府與噶布什賢章京吳拜設伏破敵進世職三等甲喇章京九年從貝勒多爾袞略山西自平魯衛入寧武關擊敗明兵復與甲喇額眞布顏等調明兵錦州與噶布什賢噶喇依昂邦勞薩等隔明兵冷口崇德三年從貝勒岳託伐明入牆子嶺明兵自密雲突出與勞薩分兵擊敗之得巨砲二十復擊敗明總督吳阿衡攻眞定破太監高起潛兵追至運糧河敵夜犯本旗營偕牛彘額眞俄兌等力戰郤敵六年從鄭親王濟爾哈朗圍錦

州明兵自杏山赴援鄭親王設伏令席特庫以噶布什賢兵誘敵伏發還擊大破之明總督洪承疇出松山拒戰席特庫與勞薩力戰破敵師復圍錦州承疇以十三萬人赴援席特庫與噶布什賢入章京迎戰擊敗其將王樸等承疇退塔山我師踞擊屢勝復退杏山席特庫縱橫馳突追至筆架山斬四百餘級得馬二百四十有奇獲糧六明兵自松山杏山二城潛遁席特庫與噶布什賢章京布爾遜追擊斬數百人得其駝馬七年克松山從豫郡王多鐸伐明兵自寧遠至擊卻之以功進世職二等甲喇章京旋率兵自界嶺口毀邊牆入敗山海關明兵將攻薊州明總兵白騰蛟白廣恩合軍赴援席特庫與噶布什賢章京瑚里布督兵奮擊破陳斬將得馬六百有奇順治元年從入關破李自成將唐通於一片石固山額真葉臣徇山西上命席特庫益其軍至絳州渡河下汾州平陽降自成將康元勳進攻黑龍關降明將及其兵三千人二年移師略湖廣遂自成至安陸斬四百餘級奪其戰艦進世職一等三年從豫親王討蘇尼特部騰機思次土喇河土謝圖等部以兵遮道席特庫督兵追擊斬獲無算迭

進一等阿思哈尼哈番康熙五年卒

藍拜亦佟佳氏滿洲鑲藍旗人父噶哈太祖時來歸授牛叅額眞藍拜事太宗天聰八年授巴牙喇甲喇章京從固山額眞阿山略錦州又從噶布什賢噶喇依昂邦勞薩率兵迎察哈爾部衆之來歸者尋擢梅勒額眞崇德四年以不稱職解任尋命借承政薩穆什喀索海征索倫部仍領梅勒事道虎爾哈部攻克雅克薩城索倫部長博穆博果爾迎戰與索海設伏夾擊大破之以功授世職牛叅章京賜貂皮及所獲人戶六年從鄭親王濟爾哈朗圍錦州明兵來奪砲擊卻之擢兵部參政明總督洪承疇援錦州藍拜與諸將進擊破三營敵乘兩侵右翼藍拜及甲喇額眞遜塔等與戰敵敗走尋調禮部順治元年從入關進世職三等甲喇章京三年復授梅勒額眞從大將軍孔有德征湖南明桂王由榔據武岡其總督何騰蛟遣其將王進才黃朝宣張先璧等拒戰有德至長沙擊走進才令藍拜與梅勒額眞卓羅追擊殲其衆過半下湘潭朝宣屯燕子窩藍拜與梅勒額眞佟岱乘艦至瀘口督兵破其營尋從尙可喜援桂陽還師攻

道州又與可喜合軍攻沅州先暨自黔陽山扼隘爲五營藍拜率先與戰斬七千餘級遂薄城先暨又以三萬人拒戰敗潰遂克之賜黃白金進世職二等六年兼任禮部侍郎八年擢固山額真兼工部尙書九年調刑部尋命罷尙書專領固山事累進世職二等阿思哈尼哈番十年命率兵鎮湖南明將孫可望等出峽窺湖北蓋拜督兵防禦敵不能犯十三年召還上親勞以酒諭曰爾等爲朕宣力年久矣今見爾等形貌癯瘠朕心惻然尋以老病乞罷加太子太保康熙四年卒

鄂碩棟鄂氏滿洲正白旗人祖楡布太祖時率四百人來歸賜名魯克素子錫罕授世職備禦天聰初從伐朝鮮先驅戰沒鄂碩錫罕子也太宗以錫罕死事進世職游擊以鄂碩襲八年從貝勒多鐸伐明攻前屯衛斬邏卒又從噶布什賢噶喇依昂邦勞薩率將士迎察哈爾部來歸者授牛象額真九年招察哈爾部伐明白朔州至崞縣斬邏卒自平魯衛出邊明兵邀戰鄂碩與固山額真圖爾格擊卻之進世職二等甲喇章京擢巴牙喇甲喇章京崇德元年與勞薩將

百人偵明邊至冷口斬獲卒得馬十五二年護甲喇額真丹岱等與土默特互市赴歸化城斬明羅卒三年從睿親王多爾袞伐明自青山口入邊擊敗明太監高起潛兵四年與噶布什賢章京沙爾虎達將工默特兵三百略寧遠挑戰明兵堅壁不出得其樵探者以還五年從圍錦州以噶布什賢兵敗敵驍明總督洪承疇赴援上營松山杏山聞命吳拜等以偏師營高橋東鄂碩調明兵自杏山潰出告吳拜吳拜未進擊明兵復入城上以鄂碩不親擊責之六年復圍錦州分兵略寧遠遇明兵六百騎擊破之得薙二馬六十餘七年從伐明自界嶺口入邊敗明總督范志完軍於豐潤明兵自密雲出劫我輜重奮擊卻之遂越明都趙山東師出邊明總兵吳三桂邀戰復擊之潰追斬數十級得薙三邏卒二十九馬二百餘順治初從入關逐李自成至慶都從豫親王多鐸討之自成據潼關倚山爲寨鄂碩與噶布什賢噶喇依昂邦努山攻拔之二年移師南征鄂碩將噶布什賢兵先驅至睢寧敗明兵從端重親王博洛下蘇州擊明巡撫楊文驤舟師得戰艦二十五趨杭州敗明魯王以海兵獲總兵一復與巴牙

喇謙章京哈密阿克湖州世職累進二等阿思哈尼哈番六年擢鎮白旗滿洲
梅勒額眞從鄭親王濟爾哈朗征湖廣師還賚白金三百八年授巴牙喇謙章
京十三年擢內大臣世職累進一等精奇尼哈番十四年以其女册封皇貴妃
進三等伯十四年卒贈三等侯諡剛毅子費揚古自有傳羅碩鄂碩兄也初授
刑部理事官從入關擢甲喇額眞順治六年姜瓖叛命梅勒額眞卦喇駐軍太
原瓖遣兵陷清源與卦喇分道擊之瓖兵棄城走斬五千餘級瓖遣兵犯太原
從端重親王博洛破賊壘斬萬餘級其徒圍絳州擾浮山迭戰勝之八年擢工
部侍郎進世職三等阿思哈尼哈番九年從征湖南失利奪官降世職尋授大
理寺卿十七年以從女追册端敬皇后授一等阿思哈尼哈番康熙四年卒鄂
爾多羅碩孫初授侍衛累遷至侍郎歷戶刑二部授內務總管擢尙書歷兵戶
吏三部卒諡敏恪

伊拜赫舍里氏世居齊谷父拜思哈歸太祖授牛象額眞旗制定隸滿洲正藍
旗卒伊拜與其兄宜巴里弟庫爾蘭分轄所屬爲牛象額眞太宗卽位察哈爾

部貝勒圖爾濟來歸命伊拜迎犒天聰八年上自將伐明命伊拜徵科爾沁部兵予世職半個前程九年遷蒙古正白旗固山額真崇德元年從伐明入長城攻克昌平等州縣俘獲甚衆三年九月從伐明入青山口薄明都徇山東五年從伐明圍錦州明兵自杏山松山赴援城兵出戰伊拜屢擊敗之六年復圍錦州破朔兵進世職牛汝章京洪承疇赴援上自將擊之命諸將分屯要隘要明兵伊拜兵梅勒額真譚拜等依杏山而營明兵敗走伊拜逐擊至塔山明兵多赴水死七年遂破承疇下錦州命伊拜戍杏山八年復命與輔國公篇古戍錦州是時軍紀嚴將士有過輒論罰伊拜屢坐罰緩罰馬順治元年調蒙古正藍旗固山額真從入關擊李自成尋與固山額真葉臣等徇山西克太原撫定旁近州縣師還賚白金三百二年從英親王阿濟格徇陝西逐自成至武昌屢擊破賊壘三年進三等阿達哈哈番五年從鄭親王濟爾哈朗徇湖南時衡州寶慶諸府尙爲明守六年師克湘潭伊拜與固山額真佟圖賴等分兵向衡州未至三十里明兵千餘人據橋立寨伊拜與侍郎碩詹擊之潰薄城戰屢勝斬明

將陶養用遂克衡州別軍略寶慶及辰沅靖武岡諸州皆定師還贛白金三百
尋請老授議政大臣累進一等阿思哈尼哈番十五年卒贈太子太保諡勤直
第三子費揚武襲世職庫爾開天聰間以牛彘額真從伐黑龍江有功于世職
半個前程崇德三年授都察院理事官兼甲喇額真五年從伐索倫部與其部
長博穆博果爾力戰却之從睿親王多爾袞圍錦州攻松山戰有功六年擢都
察院參政復從圍錦州明兵自松山來將奪軍中炮庫爾開擊却之率師依山
爲寨明兵復來攻勢甚猛工部承政薩穆什喀欲遣兵助戰庫爾開辭焉獨以
所部迎戰斬四十一級得雲梯槍砲甲楯旗幟進世職牛彘章京八年遷蒙古
正藍旗梅勒額真順治初從入關遂李自成至慶都加半個前程旋從豫親王
多鐸破自成潼關累進二等甲喇章京四年命帥師駐防濟南淄川寇發庫爾
開遣兵討之部議責庫爾開不親赴當罰綏盡削其官職上但命倍其罰五年
遷都察院承政尋仍改參政六年從譚泰討金聲桓江西卒軍進一等阿達哈

哈番

阿哈尼堪富察氏滿洲鑲黃旗人世居葉赫天命時曾祖椿布倫借兄楚隆阿弟昂古里來歸阿哈尼堪初授牛象額真天聰九年同蒙古兩黃旗將領布哈阿濟拜略明寧遠明兵千人追至還擊敗之崇德二年從征朝鮮取江華島五年從承政薩穆什喀索海伐虎爾哈部克雅克薩城博穆博果爾以烏喇哈兵六千來襲正藍旗後隊索海設伏擊之阿哈尼堪與焉又攻掛喇爾先入屯授世職牛象章京擢禮部參政六年從伐明圍錦州擊敗松山援兵又與固山額真宗室拜音圖收明總督洪承疇兵松山守將夜襲我軍又遣步兵犯正黃旗蒙古汛地阿哈尼堪擊却之擢鑲黃旗梅勒額真順治元年從入關擊李自成世祖將遷都燕京命內大臣何洛會鑲盛京阿哈尼堪與梅勒額真碩詹將左右翼爲之佐尋命偕固山額真阿山等率兵之蒲州助勦流寇二年進世職三等甲喇章京大將軍豫親王多鐸南征命阿哈尼堪會師自河南下江南攻揚州明兵來援率甲喇額真班代等連戰皆捷與固山額真瑪喇希克常熟三年從豫親王北討蒙古蘇尼特部騰機思遁走迫擊斬百餘級俘獲無算進世職

一等四年擢兵部尙書六年鄭親王濟爾哈朗師略湖廣阿哈尼堪與固山額
眞劉之源別將兵趨寶慶明將王進才馬進忠城守師夜薄城平旦明兵出戰
急擊殲之遂克寶慶明將馬有志等九營屯南山阿哈尼堪乘勝奮進陳斬有
志等師徇洪江又破袁崇第十營克沅州師復進留阿哈尼堪駐守明將王強
等來攻阿哈尼堪遣署巴牙喇囊章京都爾德等迎擊戰沅水上大破之斬裨
將三兵七百餘七年師還賜白金三百調禮部尙書加世職拖沙喇哈番睿親
王遣迎朝鮮王弟阿哈尼堪啓巽親王滿達海等以甲喇額眞恩德代行事覺
下王大臣會勘論死得旨奪世職罰鍰以贖尋復世職累進一等阿思哈尼哈
番八年卒星訥覺爾察氏滿洲正白旗人初事太祖授二等侍衛兼牛象額眞
從伐明次塔山北遇蒙古兵四百射殺其渠事太宗伐察哈爾以二十人偵敵
張家口遇明兵禦之四晝夜俟貝勒阿濟格軍至益兵二百擊破之察哈爾部
多爾濟蘇爾海倚山立寨列火器拒守星訥率巴牙喇兵先登破敵天聰八年
復從上伐察哈爾星訥佐額駙布顏代率蒙古兵進哈麻爾額領招其部俄爾塞

圖等來降移師伐明與席特庫等略大同輸功予世職半個前程授刑部參政崇德三年與承政葉克舒伐黑龍江師有功其兄辛泰弟西爾圖戰沒當得世職合爲三等甲喇章京尋坐事降理事官四年授巴牙喇甲喇章京兼贖政大臣尋遷梅勒額真六年授工部參政八年擢承政順治元年從入關改尙書進世職一等三年從討張獻忠師還加太子少保六年從討姜瓖攻大同瓖以精銳出戰填塹毀垣星訥督將士持短兵力戰却之瓖背城爲陳星訥督將士直壓其壘師乘之殲其精銳略盡進世職二等阿思哈尼哈番八年英親王阿濟格得罪星訥故爲王屬坐奪官削世職籍家產之半尋復授工部尙書贖政大臣十年以老致仕十四年星訥自訟軍功復世職一等阿達哈哈番兼拖沙喇哈番康熙十三年卒諡敏襄

褚庫薩爾圖氏滿洲鎮黃旗人先世居札魯特祖柏德遷居葉赫來歸天聰四年師圍大凌河褚庫年十七從軍明軍中蒙古將倣濟格突陳褚庫迎擊生獲以歸復伐明攻萬全左衛褚庫先登頸被創猶力戰破其城論功授世職備禦

賜號巴圖魯授牛象額眞兼甲喇額眞崇德三年授吏部理事官順治元年入關從英親王阿濟格討李自成略湖廣自成將吳伯益以三千人拒戰褚庫擊之敗走三年從肅親王豪格討張獻忠略陝西與尙書星訥擊獻忠將高汝礪等遂下四川屢敗獻忠兵六年從討姜瓖圍大同敗瓖將楊振威師還坐值宿失印鑰解理事官九年從固山額眞噶達渾征鄂爾都斯部與其部長多爾濟戰賀蘭山俘獲甚衆世職累進二等阿達哈哈番十三年鄭成功攻福州時鄭親王世子濟度率師次漳州遣梅勒額眞阿克善與褚庫別將兵赴援成功以戰艦二百自烏龍江來犯褚庫督兵迎戰遂至大江口得舟十二成功又以千餘人屯江岸褚庫督兵奮擊斬二百餘級康熙二年擢正紅旗蒙古副都統進世職一等七年以老乞休十四年卒諡襄壯

論曰科爾崑覺善甘都速事太祖諱拜以下諸將則太宗所驅策入關後四征不庭成一統之業皆與有功焉科爾崑尤忠直與席特庫褚庫並以驍武擐旗陷陳干城腹心由此其選矣

清史稿

列傳二十九

覺羅果科

佐屬阿其特

敦拜

字本剛子 烏魯色

濟席哈

弟費雅惠

噶達渾

費福武 費社右

烏魯

與弟兄 烏魯 謝奇

達素

喀爾塔喇

喀爾塔喇子 謝特赫

覺羅果科滿洲鑲白旗人未詳其屬籍事太宗授巴牙喇甲喇章京崇德六年從伐明圍錦州分兵屯杏山河岸明兵自寧遠至果科與噶布什賢噶喇依昂邦努山擊破之遂至連山斬級三十得馬三十二七年與努山略寧遠明兵自中後所犯我牧地擊之潰遁八年復與努山至界嶺口調明兵與戰斬裨將一步騎三百餘順治元年從入關擊李自成追至慶都二年從英親王阿濟格下陝西克綏德自成兄子錦據延安果科與巴牙喇章京希爾根三戰皆捷自成奔湖廣師從之次安陸迭擊敗之得舟八十三年從肅親王豪格討張獻忠經漢中擊叛將賀珍進次西充破獻忠復與希爾根搜勦餘寇五年從鄭親王

濟爾哈朗下湖南授巴牙喇甲喇章京攻湘潭明總督何騰蛟城守果科與噶
布什賢章京瑚沙破西門入尋與固山額真修圖賴率兵趨衡州擊破明兵攻
拔石橋寨又擊破明將周進唐胡一清等逐一清至全州師還授刑部理事官
十一年授工部侍郎叙功遇恩詔並以監修壇廟世職累進二等阿達哈哈番
十七年擢工部尙書十八年卒追坐修倉糜費罰鍰降世職拖沙喇哈番聖祖
親政其子薩爾布訴枉復拜他喇布勒哈番覺羅阿克善滿洲正黃旗人景祖
兄索長阿三世孫事太宗授甲喇額真崇德六年圍錦州與果科同行擊敗
明總兵吳三桂及松山杏山援軍師還明兵襲梅勒額真索海軍阿克善與巴
牙喇章京伊爾德赴援擊卻之又屢擊敗總督洪承疇軍授半個前程八年
從鄭親王濟爾哈朗伐明攻寧遠分兵攻前屯衛先登克其城順治元年從入
關七年擢正黃旗滿洲梅勒額真兼工部侍郎八年調兵部叙功並遇恩詔進
世職一等阿達哈哈番九年與固山額真噶達渾征蒙古鄂爾斯部殲其衆於
賀蘭山總兵任珍殺其孥賄兵部寢勿治事發阿克善罷侍郎降世職拜他喇

布勒哈番兼拖沙喇哈番十一年暫署都察院左都御史從征湖廣戰湘潭常德龍陽屢捷十三年從鄭親王世子濟度討鄭成功師次烏龍江水險不可渡乃問道趨福州分兵令牛象額真褚庫先驅擊成功署巴牙喇囊章京伊色克圖擊成功舟師遂至福州謀言成功舟三百泊烏龍江阿克善等水陸合擊逐敵至三江口斬其將林祖蘭等俘獲甚衆十四年成功兵侵羅源阿克善督兵赴援力戰死之進世職三等阿達哈哈番

敦拜富察氏滿洲正黃旗人先世居沙濟父本科理歸太祖嘗從鄂佛洛總管達賴討朱舍理部長尤額楞有功賜號蘇赫巴圖魯授牛象額真卒敦拜嗣天命十一年從太祖攻寧遠先驅收城兵師還敵騎追射敦拜還擊卻敵殿而歸天聰八年授世職牛象章京崇德五年擢巴牙喇囊章京從鄭親王濟爾哈朗圍錦州城兵出誘戰敦拜突入敵隊中斬三人衆悉遁明兵自杏山再來犯皆戰卻之六年復圍錦州明兵自松山攻兩紅旗及蒙古軍敦拜禦敵力戰斬二百餘級得雲梯十四七年加半個前程八年與巴牙喇囊章京阿濟格尼堪率

師駐錦州順治元年從入關擊李自成逐之至慶都二年進世職二等甲喇章京大將軍豫親王多鐸南征敦拜將巴牙喇兵從次陝州破自成將劉方亮方亮兵夜襲營復擊敗之克潼關定西安自成走商州入湖廣敦拜與巴牙喇章京阿爾津等追斬三百餘級從豫親王下江南克揚州薄明南都追明福王至蕪湖與阿爾津圖賴等截江口擊破明將黃得功得明福王以歸三年進世職一等從端重親王博洛自浙江徇福建與梅勒額真珠瑪喇合軍破敵五年從大將軍譚泰討金聲桓攻九江破王得仁軍克之撫臨江郡縣六年剿畿南土寇斬其渠獻雄任邱寶坻諸縣悉定七年進世職三等阿思哈尼哈番尋從睿親王敗於中後所坐私出獵降世職一等阿達哈哈番八年上親政復世職九年進二等十一年明將李定國犯廣東命佐將軍珠瑪喇討之克新會逐之至橫州江岸定國引去師還世職一等精奇尼哈番以病乞休加太子太保十四年起爲盛京總管十七年卒諡襄壯乾隆初定封一等男富察之族有哈寧阿碩詹濟席哈費雅斯哈皆以武功顯哈寧阿滿洲鑲白旗人世居額宜湖父

阿爾圖山率其族攻薩齊庫城殺其部長喀穆蘇尼堪撫降三百餘人以歸太祖授牛象額眞既復分其衆別編一牛象以命哈寧阿天聰二年從貝勒岳託等伐明略錦州攻松山杏山高橋諸寨堡戰甚力授巴牙喇章京三年從伐明薄明都與袁崇煥戰廣渠門外以功授世職備禦五年從攻大凌河八年從攻大同哈寧阿先驅至小西城樹雲梯以攻克之復將二十人出戰敗敵兵三百九年與承政圖爾格入明邊師還道平魯衛明兵歸師後還擊敗之逐薄濠多所斬馘進二等甲喇章京崇德元年從攻皮島二年授議政大臣三年從豫親王多鐸如錦州會師道中後所祖大壽以輕騎掩我師甲喇額眞翁克及土默特兵先奔哈寧阿且戰且退士卒有死者論罪當死上貸之命奪世職籍家產之半四年復以庇牛象額眞阿蘭太失律論罪當死上復貸之六年從圍錦州屢敗敵明總督洪承疇赴援上督諸軍環松山而營度明師且遁遣諸將分地爲伏以待哈寧阿與巴牙喇章京繁拜陳於海濱夜初更明師循海走哈寧阿等起掩擊明師蹂藉死者甚衆尋進攻松山屢敗敵八年三月與巴牙喇

義章京阿爾津伐虎爾哈部俘男婦二千五百有奇獲牲畜貂皮無算師還上厚賚之順治元年從入關擊李自成戰慶都再戰眞定自成焚輜重走二年復授世職三等甲喇章京逐賊綏德徇延安戰破城兵南逐自成戰安陸得舟八十復與譚泰合兵下江南戰江上奪敵舟逐敵至富池口敵據江岸爲陳復擊之敗三年二月從順承郡王勒克德渾略湖廣破明將吳汝義降其衆四月進二等甲喇章京五月從肅親王豪格討叛將賈珍取漢中逐賊至秦州珍黨武大定據三寨山山勢峻不可攻師圍之會其將周克德石國璽皆乞降克德遣其子導師自僻徑登國璽爲內應哈寧阿與梅勒額眞阿拉善署巴牙喇義章京噶達渾將六百人破壘入賊皆自投崖下斬殺略盡進討張獻忠徇夔州茂州資州遵義皆下五年師還進一等阿達哈哈番尋卒額詹滿洲正紅旗人世居納殷父舒穆祿歸太祖授牛象額眞卒額詹嗣尋兼甲喇額眞天聰五年與甲喇額眞杭什木沙爾虎達等略明邊遇邏卒斬其三俘其五及邏卒長八年授世職牛象章京崇德元年從伐朝鮮攻江華島額詹舟越朝鮮戰艦繼牛象

額真阿哈尼堪以登率衆合圍降其城加牛箇前程三年兼刑部理事官從伐明深入山東克禹城平陰四年師還明兵襲我後軍與巴圖魯尼哈里等擊卻之進世職三等甲喇章京擢戶部參政五年師伐明命額詹如朝鮮徵糧及水師助戰從圍錦州甲喇額真禧福率甲士二十四駐守駱駝山明兵四百夜切營額詹赴援斬二百餘級得馬十六七年領本旗梅勒額真順治元年從入關改侍郎上將遷都燕京命額詹統右翼兵留守盛京尋復命從豫親王多鐸南征自河南徇陝西遂移師定江南敘功世職累進一等阿達哈哈番兼拖沙喇哈番五年從鄭親王濟爾哈朗征湖南借都統佟圖賴等師出湘潭明兵阻橋立寨與固山額真伊拜巴牙喇甲喇章京覺羅果科共擊下之斬其將陶養用衡州平師還賚白金三百進世職一等阿思哈尼哈番八年坐戶部給饟不均降世職一等阿達哈哈番九年以老病罷十年命復世職康熙二年卒諡明敏以其孫達色法色分襲世職並授二等阿達哈哈番達色以參領從征福建戰屢捷鄭錦將劉國軒衆萬餘犯海澄達色赴援冒鎗砲力戰聞城陷自經死加

拖沙喇哈番法色兼襲復合爲一等阿思哈尼哈番兼拖沙喇哈番子明寶雅
正間從征西藏有功進三等精奇尼哈番乾隆初改二等子子德成降襲三等
男

濟席哈亦富察氏滿洲正黃旗人父本科里官牛泉額真濟席哈初亦授牛泉
額真崇德四年擢巴牙喇總章京五年從伐明圍錦州明兵自松山至邀戰與
甲喇額真布丹希爾根等擊卻之尋駐義州護屯田上誠諸將固守營壘勿與
明兵戰明兵犯鎮藍旗營濟席哈越鎮紅旗營助戰以擅離汎地奪官籍其家
三之一旋與梅勒額真席特庫伐索倫部得其部長博穆博果爾以歸六年師
還與宴勞七年授正紅旗蒙古梅勒額真八年兼戶部參政順治元年從入關
擊李自成追之至慶都叙功授世職拜他喇布勒哈番二年從端重親王博洛
下浙江既克杭州以梅勒額真駐守明大學士馬士英總兵方國安據嚴州屢
來犯濟席哈督兵禦之五戰皆捷還京授工部侍郎加世職拖沙喇哈番五年
命率兵駐東昌尋以鄭彩寇福建命從將軍陳泰南征克長樂連江同安平和

諸縣進世職二等阿達哈哈番七年調刑部擢尙書進世職三等阿思哈尼哈番九年授正紅旗蒙古固山額真十年解尙書膠州總兵海時行叛命與梅勒額真瑚沙討之未至時行走宿州降詔移兵鎮湖南十一年召還十四年命率梅勒額真四巴牙喇甲喇章京八從大將軍貝子羅託征雲南十五年命佐將軍卓布泰師進次都勻擊敗明將李定國會師克雲南十七年以勦從征將士功罪不實降一等阿思哈尼哈番十八年授靖東將軍討棲霞土寇于七擊破所據岵嶠山寨七竄入海康熙元年卒六十年以其子西安副都統阿祿疏請追設勇壯費雅思哈濟席哈弟也初以巴牙喇壯達事太宗天聰六年從伐察哈爾分兵略大同至朔州城兵出戰費雅思哈與甲喇額真道喇等擊敗之崇德三年署巴牙喇叢章京從貝勒岳託伐明敗密雲步兵五年師圍錦州明兵自松山杏山赴援費雅思哈禦戰皆捷六年復圍錦州同甲喇額真哈寧阿擊敵城下射殞三人明總督洪承疇步隊自松山至費雅思哈力戰卻敵順治元年從入關擊李自成追敗之慶都授巴牙喇甲喇章京從英親王阿濟格西討

二年春次榆林自成兵夜襲營與巴牙喇蠶章京車爾布等擊之走追自成至武昌屢破其壘又以舟師邀擊富池口得舟三十三年從肅親王豪格討張獻忠道西安分兵徇邠州其渠胡敬德以千餘人據三水西北山岡費雅思哈與巴牙喇蠶章京噶達渾破其壘復與固山額真巴哈納擊叛將賀珍於鷄頭關師下四川屢戰皆捷正藍旗兵爲賊困與噶達渾趨援賊走叙功授世職拜他喇布勒哈番兼拖沙喇哈番六年從英親王討叛將姜瓖掘塹圍城瓖兵步騎萬餘來犯費雅思哈先衆迎戰瓖兵不得入城瓖兵分踞左衛陷汾州窺太原費雅思哈率巴牙喇兵伺擊會師圍大同瓖黨斬以降進世職一等阿達哈哈番十三年擢巴牙喇蠶章京尋命率兵駐防湖南明將孫可望據辰州費雅思哈與固山額真卓羅梅勒額真泰什哈等自澧州常德進征可望棄城遁縱火焚舟阻我師費雅思哈取其未焚者以濟師臨擊至瀘溪殲敵甚衆十八年從將軍愛星阿入緬甸得明桂王以歸師還進世職三等阿思哈尼哈番十一年卒諡僖恪子素丹自有傳

噶達渾納喇氏滿洲正紅旗人世居哈達其先有約蘭者當太祖時率其子懋巴里等來歸天聰二年噶達渾以巴牙喇甲喇章京從太宗伐多羅特部有功八年從伐明略山西克應州崇德五年從伐明略中後所睿親王多爾袞等率師圍錦州令領薩先進敗杏山騎兵設伏松山斬十餘級明兵營嶺上擊破之又從噶布什賢噶喇依昂邦勞薩追擊至北岡七年從豫親王多鐸攻寧遠明兵蹙我後噶達渾先衆還擊明兵潰走師還有巴牙喇兵達哈塔者被創仆掖以歸順治元年擄巴牙喇薩章京從入關擊李自成授世職拜他喇布勒哈番二年從英親王阿濟格擊自成至九宮山三敗之三年從肅親王豪格下四川次西安分兵討叛將賀珍徇邠州其黨胡敬德屯三水噶達渾與梅勒額眞和托直入破其壘高汝礪武大定等屯三寨山復與巴牙喇薩章京蘇拜哈寧阿梅勒額眞阿拉善擊敗之督步卒搜剿巖谷大定等據山巔其徒左右迎戰噶達渾與巴牙喇薩章京阿爾津奮戰挫其鋒大定等兵攻正藍旗營哈寧阿陷圍中噶達渾與阿爾津蘇拜疾馳赴援圍乃解擄戶部侍郎五年調吏部進世

職三等阿達哈哈番英親王阿濟格討叛將姜瓖噶達渾與阿拉善濟師七戰皆捷克代州進復渾源六年兼本旗蒙古固山額真七年世祖親政擢戶部尙書進世職二等改都察院左都御史尋還爲尙書率師征鄂爾多斯部獲部長多爾濟殲其衆於賀蘭山進世職三等阿思哈尼哈番調滿洲固山額真兵部尙書十年進世職二等世職呂忠行昧事發部議引赦例貸其罪坐降世職一等阿達哈哈番大將軍鄭親王世子濟度討鄭成功命噶達渾佐之敕濟度調遣官兵毋令噶達渾離左右克海澄水陸並進復福州遂下泉州攻惠安海澄衛套及閩安鎮大捷十四年師還卒贈太子太保諡敏壯同族有費揚武愛松古興鼎費揚武滿洲正藍旗人初自巴牙喇壯達累遷甲喇額真崇德七年從饒餘貝勒阿巴泰伐明入塞擊敗明總兵馬科越明都略山東次膠州明兵千餘屯城外費揚武力戰破之攻濱州以雲梯先登出塞明總督范志完總兵吳三桂等分道要我師費揚武先後與戰皆勝護所俘獲還順治初從入關擊李自成敗其騎兵尋署巴牙喇章京從豫親王多鐸西討自成次潼關破自成

將劉宗敏二年從定江南攻揚州得舟二百餘攻明南都敗其步兵逐明福王至蕪湖與明總兵黃得功戰得舟三十有一旋從端重親王博洛下浙江破明馬士英軍於杭州生致明總兵一分兵定海寧平湖土寇又與明總兵王之仁戰得舟十有六授議政大臣子世職甲喇章京加半箇前程四年從軍福建卒愛松古滿洲鎮白旗人太祖時自葉赫來歸屢從征伐崇德元年命與察漢喇嘛等赴明邊殺虎口互市復遣往科爾沁徵兵三年初設理藩院授副理事官尋自歸化城導厄魯特部長墨爾根戴青來歸再坐事鞭責順治元年授牛錄額真從固山額真葉臣徇山西時李白成西走其將陳永福據太原發礮攻城圮永福突圍走愛松古以蒙古兵戰多斬敵得馬千餘又逐自成將馬騏至河濱得舟十五年從圍延安城兵出戰擊卻之以八騎躡自成獲其孥三年從豫親王多鐸討蘇尼特部長騰機思將蒙古兵三百先驅扼隘師繼進騰機思遁走從侍郎尼堪梅勒額真明安達里乘夜追擊得其輜重斬台吉茂海遂渡圖喇河土謝圖汗以二萬人拒戰從鎮國將軍瓦克達等敗其騎兵叙功授世

職拖沙喇哈番五年命率蒙古兵六百駐太原擊斬涇陽寇李陽敗交城寇王
豪明時叛將姜瓖據大同其黨劉遷以萬餘人犯代州愛松古馳往守禦遷衆
傅雲梯乘城鉤致其梯九斬級三百遷衆穴城城上發矢石遷衆多墮乃走繁
峙六年復來襲有爲應者引入郭愛松阿嬰城守十餘日端重親王博洛師至
擊斬其渠郭芳遷遁去乃還駐太原瓖黨十餘萬來犯愛松古與巡撫祝世昌
謀遣兵赴清源徐溝防禦不使逼城下端重親王師自晉陽至破賊累擢鎮白
旗蒙古梅勒額眞世職累進二等阿達哈哈番九年從敬謹親王尼堪南征王
沒於陳愛松古不及救降世職拜他喇布勒哈番兼拖沙喇哈番十六年致仕
康熙十四年卒子訥青以三等侍衛從討鄭成功至廈門卒於軍興甯滿洲鎮
白旗人父素巴海自哈達率二百人來歸太祖編牛彘授其長子莽果興甯其
第三子也事太宗天聰八年授世職牛彘章京崇德元年從英親王阿濟格伐
明佐固山額眞達爾罕攻順義先登加半箇前程三年授工部理事官考滿進
世職三等甲喇章京順治元年從入關西討李自成自成之徒自延安出犯殺

擊大破之遂自成至武昌躡之至富池口列陳河岸與巴牙喇薩章京哈寧阿
甲喇額真希爾根擊之潰移軍江南與巴牙喇甲喇額真布克沙敗明將黃蜚
於池州斬級二百得舟十二三年從討蘇尼特部長騰機思戰敗士謝圖汗傾
類汗二部兵擢工部侍郎累進世職二等阿思哈尼哈番十五年以勦羅源戰
敗將士有所徇奪官削世職十八年聖祖即位復授一等阿達哈哈番兼拖沙
喇哈番康熙三年卒哈爾奇莽果孫也順治十六年以巴牙喇壯達從軍鄭成
功內犯自荊州援江寧破成功將楊文英署巴牙喇甲喇章京討耿精忠迭戰
敗其將楊益茂於九江邵聯登於建昌又敗吳三桂將夏國相於萍鄉謝勝先
於瀏陽吳國貴於武岡叙功授拖沙喇哈番卒

達素章佳氏滿洲鎮黃旗人先世居費雅朗阿天聰五年以巴牙喇壯達從伐
明圍大凌河明兵來援與巴牙喇壯達熬拜同擊卻之略明邊斬敵騎帥還擢
巴牙喇甲喇額真崇德五年從圍錦州敗杏山明兵六年復圍錦州明兵數十
入據塔山列火器拒守達素率六騎馳而上盡斬之復率兵逆擊明兵走海岸

溺死者無算七年從徇寧遠敗明騎兵八年從巴牙喇蘇章京阿爾津等伐虎爾哈部克博和理城又招降能吉爾大噶爾達蘇諸屯順治元年從入關擊李自成從固山額真巴哈納等徇山西克絳州逐賊至黃河賊以舟濟達素督兵射之賊多墮水死二年從英親王阿濟格下湖廣討自成克安陸武昌逐之至富池口賊營對岸達素先諸將衝擊多所俘獲二年從肅親王豪格討張獻忠道漢中擊破賀珍下四川屢戰皆捷積戰功授世職拜他喇布勒哈番兼拖沙喇哈番六年從英親王阿濟格討姜瓖戰於右衛賊大至達素奮前搏擊飛矢及其喉手足皆創墮馬軍校欲負以退叱曰死則死耳何避爲裏創督兵復戰墮兵敗卻世職累進一等阿達哈哈番九年從敬謹親王尼堪征湖南次衡州貝勒屯齊令別將兵誦敵寶慶遇敵擊敗之進攻全州破寨五斬所置文武吏九及其徒四千餘復興安灌陽復斬定國將倪兆龍敬謹親王沒於陳將佐俱坐罪達素以別將兵克敵得免議十一年擢巴牙喇蘇章京十三年擢內大臣十六年鄭成功內犯江寧授達素安南將軍同固山額真索渾巴牙喇蘇章京

賴塔等率師赴援至則成功已敗走移師赴福建十八年召還康熙八年熬拜敗達素爲所引用坐罷官尋復世職卒同族有喀爾塔喇喀爾塔喇滿洲鎮白旗人先世亦居費雅朗阿父圖爾坤詹當太祖時率五子及所部百餘戶來歸授牛录額眞卒喀爾塔喇嗣事太宗崇德三年以巴牙喇甲喇章京從豫親王多鐸伐明略寧遠將入邊破明兵及還又連敗之六年從圍錦州城兵出犯廂黃旗分守濠暫坐退避罪當死上命劄綏以贖順治元年從入關擊李自成將本旗敗其騎兵逐之至慶都盡殲其後隊旋從固山額眞巴哈納等徇懷慶入山西境破賊黃河渡口逐之至榆林二年自成走湖廣移師從之與巴牙喇甲喇章京熬拜攻克安陸督兵進剿毀其壘得舟六十餘五年從大將軍譚泰討金聲桓師次童子渡聲桓兵據水而陳方舟爲梁喀爾塔喇奪以度師分兵趨饒州聲桓遣別將以三千人迎戰喀爾塔喇與甲喇額眞巴朗等擊敗之克饒州進次南昌營甫定聲桓兵出戰奮戰挫其鋒師合圍喀爾塔喇屯江岸聲桓兵以舟運糧入城喀爾塔喇邀擊得舟八又縱火焚舟七百餘師次城北喀爾

塔喇與甲喇額真良泰分兵攻城南六年春克南昌九年擢巴牙喇蠶章京從敬謹親王尼堪征湖南衡州乘勝疾進遇伏力戰與王同沒於陳喀爾塔喇積戰功世職累進一等哈達哈番卹進三等阿思哈尼哈番諡忠壯子赫特赫襲十六年以甲喇額真從討鄭成功攻廈門戰死予世職拜他喇布勒哈番論曰滿洲諸大家多以地爲氏往往氏同而所自出異戰績既著門材遂張濟席哈達素嘗專將雖所當非大敵或未與敵遇要其才望必有足以勝此任者果科等皆以裨佐樹績行間動閱所存亦不得而略焉